




Visitim Jisas long Santu Sakramen

*Rot bilong beten long taim bilong adoresen
na long taim yumi i laik visitim Jisas long haus lotu*

SANTU ALFONS MARIA BILONG LIGUORI

VISITIM JISAS
I STAP LONG
SANTU SAKRAMEN

© IVE Fathers in Papua New Guinea
ive.png@gmail.com

INSAIT

TOK I GO PAS.....	1
ROT BILONG BETEN WANTAIM DISPELA BUK	3
PREA LONG JISAS	5
SPIRITUAL KOMUNIO	6
PREA LONG SANTU MARIA.....	7
PREA LONG SANTU JOSEP.....	8
DE NAMBA 1	9
DE NAMBA 2.....	15
DE NAMBA 3.....	19
DE NAMBA 4.....	23
DE NAMBA 5.....	27
DE NAMBA 6.....	31
DE NAMBA 7	35
DE NAMBA 8.....	39
DE NAMBA 9.....	43
DE NAMBA 10.....	47
DE NAMBA 11.....	51
DE NAMBA 12.....	55
DE NAMBA 13.....	59

DE NAMBA 14.....	63
DE NAMBA 15.....	67
DE NAMBA 16.....	71
DE NAMBA 17.....	75
DE NAMBA 18.....	79
DE NAMBA 19.....	83
DE NAMBA 20.....	87
DE NAMBA 21.....	91
DE NAMBA 22.....	95
DE NAMBA 23.....	99
DE NAMBA 24.....	103
DE NAMBA 25.....	107
DE NAMBA 26.....	111
DE NAMBA 27.....	115
DE NAMBA 28.....	119
DE NAMBA 29.....	123
DE NAMBA 30.....	127
DE NAMBA 31.....	131
LOTU BENEDIKSEN WANTAIM HOLI YUKARIS.....	135
LITANI BILONG GOD TRIWAN	137
LITANI BILONG JISAS	137
LITANI BILONG HOLI SPIRIT 1	138
LITANI BILONG HOLI SPIRIT 2	138
LITANI BILONG BODI NA BLUT BILONG JISAS 1	139
LITANI BILONG BODI NA BLUT BILONG JISAS 2	139
LITANI BILONG SANTU HAT BILONG JISAS.....	140
LITANI BILONG SANTU MARIA	140

TOK I GO PAS

Santu Alfons Maria bilong Liguori (1696 - 1787) em i wanpela bikpela santu insait long Katolik Sios. Mama Sios i save kolim em «Tisa», long wanem ol gutpela skul na buk bilong em i save skulim ol manmeri long planti samting bilong God. Na Mama Sios i save strongim ol katolik manmeri long ridim ol naispela buk na skul bilong dispela santu.

Na olsem mipela i laik bihainim dispela tok bilong Mama Sios, na mipela i bin redim dispela buk santu Alfons i bin raitim bilong helpim yumi long mekim gutpela prea long taim bilong adoresen na long taim yumi go visitim Jisas long haus lotu.

Long dispela graun i no gat wanpela samting i ken winim sakramen bilong yukaris, long wanem Jisas yet i stap long dispela sakramen. Maski ai bilong yumi i no inap lukim em, bilip bilong yumi i tokaut klia olsem: **Jisas i stap tru long santu yukaris**, na em i inap lukim yumi na harim ol singaut bilong yumi. Na olsem taim yumi prea klostu long tabernakel

o yumi go long adoresen, yumi i stap klostu long Jisas wankaim olsem ol manmeri bilong Israel i bin stap klostu long em taim Jisas i bin stap long dispela graun.

Na olsem wantaim dispela buk mipela ol pris i laik strongim na helpim ol manmeri long visitim Jisas long haus lotu na long givim taim bilong ol long em long taim bilong adoresen.

Insait long dispela buk yumi bai painim 31 prea long Jisas, long santu Maria na long santu Josep, bai yumi i ken beten long wanwan de bilong olgeta mun.

Na taim mipela i wok long redim dispela buk, mipela ol IVE Fathers i laik tingim Bisop Alphonse Liguori Chaupa (1959 - 2016). Bisop Alphonse em i gutpela pren bilong mipela na God i singautim em i go bek long heven.

IVE Fathers
(Fathers of the Institute of the Incarnate Word)

ROT BILONG BETEN

WANTAIM DISPELA BUK

Taim yumi i laik beten wantaim dispela buk, yumi i mas bihainim gut ol dispela 10-pela hap.

- 1) Mak bilong kruse
- 2) Tok sori
- 3) Prea long Jisas (pes 5)
- 4) Visitim Jisas (bilong wan wan de)
- 5) Spiritual komunio (pes 6)
- 6) Visitim santu Maria (bilong wan wan de)
- 7) Prea long santu Maria (pes 7)
- 8) Visitim santu Josep (bilong wan wan de)
- 9) Prea long santu Josep (pes 8)
- 10) Mak bilong kruse

OL PREA

PREA LONG JISAS

Bikpela bilong mi, Jisas Krai, long bikpela laik bilong yu i kam long mipela ol manmeri, yu stap long dispela sakramen bilong alta long olgeta de na long olgeta nait. Yu pulap long marimari na laikim pasin, na yu kirapim tingting bilong mipela na singautim mipela, bai mipela i ken kam na visitim yu long tabernakel. Na yu save welkamin mipela na amamas tru taim mipela i kam long visitim yu.

Jisas, mi adorim yu. Mi man nating na mi pulap long sin, tasol mi tenkyu long yu long wanem yu bin pulapim mi long planti gutpela samting. Na tu mi tenkim yu long wanem yu stap long yukaris, na long dispela sakramen yu save givim yu yet olgeta long mi. Tu mi laik tenkim yu bikos yu bin givim Maria olsem gutpela mama i save lukautim mi na prea bilong helpim mi. Tenkyu Jisas long kirapim tingting bilong mi bai mi ken kam na visitim yu long santu sakramen bilong alta.

Mi adorim Santu Hat bilong yu, Jisas. Na mi kam bilong tenkim yu gen, long wanem yu bin givim Hat bilong yu long mipela. Tu mi laik adorim Hat bilong yu bilong halivim pen

em i save karim taim ol manmeri i givim baksait long yu. Na tu mi laik adorim dispela gutpela Hat bilong yu bikos mi save olsem planti taim ol manmeri i no save kam long haus lotu bilong adorim yu.

Jisas bilong mi, mi laikim yu wantaim olgeta strong bilong mi. Mi sori stret long ol sin mi bin mekim, na mi laik wok hat bilong abrusim ol sin na stap gut. Na nau, Jisas, mi laik givim mi yet olgeta long yu. Mi no laik bihainim laik bilong mi yet moa. Mi laik holimpasim yu tasol na givim amamas long Santu Hat bilong yu. Long nau inap long las de bilong laip bilong mi, yu ken mekim long mi wanem samting yu laikim. Yu Masta bilong mi na mi wokman nating bilong yu.

3-pela samting tasol mi askim yu, Jisas: 1) Bai yu ken laikim mi olgeta de bilong laip bilong mi, na yu no ken lusim mi. 2) Bai yu ken helpim mi long sevim sol bilong mi na go long heven. 3) Bai yu ken strongim mi long bihainim laik bilong yu tasol.

Jisas mi askim yu long helpim ol sol i stap long klinpaia, husat i bin adorim yu long yukaris taim ol i bin stap long dispela graun. Helpim tu ol sol husat i bin laikim na prea long Mama bilong yu taim ol i bin stap long dispela graun. Na kisim ol gutpela pasin bilong mi na askim Papa bilong yu long harim ol prea bilong mi na helpim mi. Amen.

SPIRITUAL KOMUNIO

Jisas, mi bilip olsem yu stap long santu yukaris. Mi laikim yu moa long olgeta samting na mi laik bai yu kam insait long sol bilong mi. Nau mi no inap long kisim yu long santu komunio,

tasol mi askim yu long kam long sol bilong mi. Na mi laik pas wantaim yu na givim mi yet long yu. Strongim mi, bai mi no ken lusim yu, na bai mi ken stap wantaim yu oltaim oltaim.

PREA LONG SANTU MARIA

Mama bilong Jisas na Mama bilong mi! Yu klin olgeta na yu no gat sin. Yu Mama bilong Bikpela bilong mi, Jisas Krai, na yu Kwin bilong heaven na graun. Yu hop bilong mi na yu save lukautim mi ol taim. Na olsem tude mi kam long yu, mi man bilong sin. Mi laikim yu, Mama, na mi tenkim yu long olgeta gutpela samting yu bin givim long mi. Planti taim mi bin givim baksait long Pikinini bilong yu na mi sapos long go long hel, tasol yu bin prea bilong helpim mi, na Pikinini bilong yu i bin pogivim mi. Mi laikim yu tumas, Mama, na long bikpela laik bilong mi i go long yu, mi laik kamap olsem wokman nating bilong yu na wok hat bai olgeta manmeri i ken save long yu na laikim yu.

Mi putim olgeta hop bilong mi long han bilong yu, long wanem yu tasol inap long helpim mi. O Mama bilong marimari, kisim mi olsem wokman nating bilong yu. Na helpim mi long winim ol traim i save kamap long mi bai mi ken abrusim ol sin. Helpim mi long laikim Jisas moa moa yet, na helpim mi tu long go long heaven.

O Mama bilong mi! Long bikpela laik bilong yu i go long God, helpim mi oltaim inap long las de bilong laip bilong mi. No ken lusim mi, Mama. Blesim mi na helpim mi long kam long yu. Amen.

PREA LONG SANTU JOSEP

Dia santu Josep, yu man bilong Maria na gutpela wasman bilong mi tu. No ken lustingting long lukautim mi olsem yu bin lukautim Mama Maria na pikinini Jisas. Mi save olsem olgeta taim ol manmeri i save ran i kam long yu bilong kisim sapot bilong yu, yu save helpim ol. Na olsem nau yu no ken les long harim ol prea bilong mi, tasol yu harim mi na givim long mi olgeta gutpela samting mi sot long em. Amen.

DE NAMBA 1

Pastaim yumi i mas beten Prea long Jisas i stap long pes 5

VISITIM JISAS

Jisas yu stap long santu sakramen na yu papa bilong olgeta gutpela samting. Na yu tokim mipela olsem: *Sapos wanpela man i dai long wara, orait em i ken i kam long mi na dring* (Jon 7:37). Olgeta gutpela samting ol santu i bin kisim, ol i bin kisim long santu sakramen bilong alta tasol. Bipo profet Aisaia i bin tok olsem: *Hul wara i no save pinis, em i save givim wara long ol samting, na ol i stap gut. Bikpela i olsem dispela wara i no save pinis. Oltaim em i save helpim yupela na mekim yupela i stap strong. Olsem na yupela bai i amamas long i go long Bikpela na askim em long helpim yupela* (Aisaia 12:3). Santu Jon bilong Avila i tok olsem em i save long wanpela meri husat i save go olgeta de long visitim Jisas long haus lotu na em i save beten planti taim, na ol manmeri long ples i save kolim em «meri i bin maritim santu sakramen», long wanem laik bilong em i go long Jisas i winim laik bilong wanpela marit meri i go long man bilong em. Na wanpela de dispela meri i tok olsem em i laik stap oltaim long

haus lotu, na em i sori stret taim em i mas lusim haus lotu na kam bek long haus bilong em. Na dispela meri i tok olsem: «Sapos mi inap, mi laik stap long haus lotu na adorim Jisas inap oltaim oltaim, long wanem Jisas tasol em i papa bilong olgeta gutpela samting, na olgeta gutpela samting i save kam long han bilong em tasol».

Jisas, yu God bilong mi! Na planti manmeri i save askim mi olsem: «Olsem wanem na yu go long adoresen? Bai yu mekim wanem? Nogut bai yu westim taim bilong yu...». Taim mi kam long adoresen mi soim laik bilong mi i go long yu, mi adorim yu, mi tok tenkyu long yu, na mi askim planti samting long yu tu. Mi kam long yu olsem wanpela tarangu i save go lukim wanpela maniman bilong askim helpim bilong em. Mi kam long yu olsem wanpela sikman i save go na lukim dokta husat inap long oraitim em. Mi kam long yu olsem wanpela man nek bilong em i drai olgeta i save go long raunwara bilong dring na stap gut. Mi kam long yu olsem wanpela man i hangre stret i save go long haus we bikipela kaikai i stap bilong pulapim bel bilong em.

Dia Jisas, yu gutpela tumas. Yu laip bilong mi. Yu hop bilong mi. Yu laik bilong sol bilong mi. Yu bin mekim bikipela sakrifais bilong stap long dispela sakramen, long wanem, bihain long Las Kaikai bilong yu, yu bin dai. Na tu nau, taim yu stap long santu sakramen, planti manmeri i save givim baksait long yu na planti i save toknogutim yu tu. Tasol laik bilong yu i go long mi i winim ol dispela samting nogut ol i mekim long yu, na olsem yu stap yet long hostia, na yu wetim mi.

Na olsem Jisas, mi laik askim yu: plis, kam hariap! Plis kam insait long hat bilong mi, na taim yu stap insait long hat bilong mi pinis, pasim dua, bai no gat wanpela samting i ken kam insait

long hat bilong mi tu. Nogat tru. Hat bilong mi em i bilong yu tasol. Na laik bilong mi i mas go long yu tasol. Yu mas kamap king bilong laip bilong mi. Yu mas kamap papa bilong olgeta samting bilong mi. Na sapos wanpela de mi givim baksait long yu na mi lusim yu, mi askim yu long stretim mi.

Yu mas helpim mi, dia Jisas, long laikim yu moa long olgeta samting. Na tu yu mas kirapim laik bilong mi long kam na visitim yu olgeta de long santu sakramen bilong alta. Mi laik kam bilong toktok wantaim yu. Mi laik kam bilong harim wanem samting yu laik tokim mi. Mi laik kam bikos mi gat bikpela laik long kisim yu olgeta de long santu komunio. Planti manmeri i save wok hat bilong kisim ol samting bilong graun, tasol mi laikim yu tasol na mi no wari liklik long ol samting bilong dispela graun.

Na tude mi laik askim dispela samting long yu, Bikpela bilong mi: helpim mi long lustingting long olgeta samting bilong dispela graun. Helpim mi long laikim yu tasol. Ol ensel na ol serafim, mi no jeles long naispela bilas bilong yupela na mi no jeles long ples yupela i stap long em, mi jeles tasol long bikpela laik bilong yupela i go long Jisas, long wanem, mi save olsem laik bilong yupela i go long Jisas i winim laik bilong mi. Na olsem yupela tu i mas helpim mi long laikim Jisas moa moa yet.

SOTPELA PREA LONG JISAS
DIA JISAS, MI LAIK LAIKIM YU TASOL!
MI LAIK GIVIM AMAMAS LONG YU TASOL!

Yumi i mas beten Spiritual Komunio i stap long pes 6

VISITIM SANTU MARIA

Sapos Jisas em i papa bilong olgeta gutpela samting, ating mipela i mas kolim Maria «Mama bilong olgeta gutpela samting». Long wanem, Maria i pulap long grasia, na em i save tilim ol dispela grasia long ol pikinini bilong em. Taim Akensel Gebriel i kamap long em, em i tokim Maria olsem: «*Ave Maria, yu pulap long grasia!*» (Luk 1:28). Na olsem yu, Mama bilong mi, yu pulap long olgeta grasia, na Jisas i bin bilasim sol bilong yu wantaim olgeta gutpela samting, na i no gat wanpela man o meri o ensel i ken winim yu. Nogat tru. Jisas tasol i winim yu, na em i putim olgeta samting long han bilong yu, bai yu ken tilim long mipela long laik bilong yu.

SOTPELA PREA LONG SANTU MARIA

MAMA, YU AS BILONG AMAMAS BILONG MIPELA.
PREA BILONG HELPIM MIPELA.

Yumi i mas beten Prea long santu Maria i stap long pes 7

VISITIM SANTU JOSEP

Dia santu Josep, i no gat wanpela ensel o santu husat mipela i ken kolim em «Papa bilong Pikinini bilong God». Yu tasol i gat olgeta rait long yusim dispela nem bilong «Papa bilong Pikinini bilong God». Na taim God yet i bin makim yu bilong lukautim Pikinini bilong em Jisas, yu winim olgeta profet bilong bipo, olgeta aposel na olgeta santu. Yu winim olgeta santu, long wanem God yet i bin makim yu olsem man bilong Maria na olsem waspapa bilong pikinini Jisas.

Taim mi prea long yu, santu Josep, mi save olsem yu dispela man God yet i bin makim bilong sambai long santu famili bilong Jisas na Mama Maria. Na nau yu stap long heven, na Jisas i bin putim yu antap tru, na yu winim olgeta santu. Na olsem helpim mi na mekim mi i pilim dispela laik bilong yu i go long mi.

SOTPELA PREA LONG SANTU JOSEP
SANTU JOSEP,
YU WASPAPA BILONG PIKININI BILONG GOD,
PREA BILONG HELPIM MIPELA.

Yumi i mas beten Prea long santu Josep i stap long pes 8

DE NAMBA 2

Pastaim yumi i mas beten Prea long Jisas i stap long pes 5

VISITIM JISAS

Wanpela saveman bilong Sios i tok olsem bret bilong dispela graun i save strongim yumi taim yumi i kaikaim em, na em i stap gut na i no save bagarap taim mipela i putim em long sampela gutpela konteina. Olsem tasol Jisas i laik stap namel long yumi long hostia olsem bret, bai yumi i ken kaikaim em na pas long em na kisim strong, na tu bai em i ken stap gut long taim em i stap long tabernakel, bai yumi i ken kam long em na visitim em. Na long dispela pasin bilong em, Jisas i soim bikpela laik bilong em i kam long yumi. Santu Pol i tok olsem maski Jisas em i God tru, taim em i kamap man em i bin stap namel long yumi olsem wokboi nating bilong yumi . Nau yumi i ken tok tu olsem Jisas i stap namel long yumi olsem bret.

Santu Pita bilong Alkantara i tok olsem i no gat wanpela man o ensel inap long autim klia long bikpela laik bilong Jisas i go long ol sol i gat grasia, long wanem dispela laik

bilong em i winim olgeta toktok na samting bilong dispela graun. Na olsem tasol, bai yumi i no ken lustingting long dispela laik bilong em i kam long yumi, em i laik haitim em yet long yukaris.

Jisas bilong mi! Yu stap hait long yukaris bai mipela i ken kam long yu na autim olgeta wari bilong mipela. Na olsem nau mi laik askim yu long harim olgeta prea bilong mi. Maski mi man bilong mekim sin, laik bilong yu em i bikpela tru na mi save olsem yu bai harim ol prea bilong mi.

Mi sori long ol sin mi bin mekim, bikos long ol sin bilong mi, mi bin givim pen long yu. Na olsem nambawan samting mi laik askim yu tude, em i olsem: Jisas, pogivim mi. Mi no laik mekim sin moa. Na tu mi laik askim yu long strongim mi, bai mi ken laikim yu moa moa yet, na bai lewa bilong mi i bilong yu tasol.

Soim bikpela pawa bilong yu na mekim mi i kamap gutpela man. Maski mi man bilong mekim sin, pawa bilong yu em inap long mekim mi i kamap gutpela. Na olsem, Jisas, givim long mi olgeta samting mi sot long em, bai mi ken laikim yu tru. Mi laikim yu, Jisas, moa long olgeta samting. Mi laikim yu moa long mi save laikim mi yet. Yu God bilong mi, na yu laik bilong mi.

**SOTPELA PREA LONG JISAS
JISAS,
YU GOD BILONG MI
NA MI LAIKIM YU
MOA LONG OLGETA SAMTING!**

Yumi i mas beten Spiritual Komunio i stap long pes 6

VISITIM SANTU MARIA

Santu Pol i tok: *Yumi ken i go klostu long God, na yumi no ken pret. Em i man bilong marimari. Yumi go long em, na bai yumi lukim em i sori long yumi. Na sapos yumi gat bevi, orait marimari bilong em bai i helpim yumi* (Hibru 4:16). Santu Antoni i tok olsem marimari bilong Mama Maria em i wankain olsem marimari bilong God, long wanem God i bin putim olgeta grasia na blesim long han bilong em.

Santu Maria, yu gutpela Kwin bilong mi! Sapos yu save marimari long ol manmeri bilong sin, yu mas helpim mi, long wanem mi bin mekim planti sin tumas. Helpim mi na kam long mi hariap.

SOTPELA PREA LONG SANTU MARIA

MAMA,

YU SAVE HELPIM OLGETA MANMERI BILONG SIN.
MARIMARI LONG MI.

Yumi i mas beten Prea long santu Maria i stap long pes 7

VISITIM SANTU JOSEP

Mama Sios i tok olsem santu Josep i pulap long olgeta grasia na blesim bilong God, long wanem God Papa i bin makim em olsem man bilong Maria na waspapa bilong Jisas.

Santu Josep, nau yu stap long heven na yu sindaun klostu long Jisas. Yu tu i mas marimari long mi, long wanem mi stap yet long dispela graun, na mi save mekim kain kain pasin i no stret, na mi pret long lusim grasia bilong God.

Helpim mi na sambai long mi olgeta de inap long de mi tu
i ken kamap long heven wantaim Jisas.

SOTPELA PREA LONG SANTU JOSEP
SANTU JOSEP, GIVIM GRASIA LONG MI
NA HELPIM MI LONG SEVIM SOL BILONG MI.

Yumi i mas beten Prea long santu Josep i stap long pes 8

DE NAMBA 3

Pastaim yumi i mas beten Prea long Jisas i stap long pes 5

VISITIM JISAS

Long santu sakramen bilong alta yumi i painim Jisas. Em i bin givim laip bilong em bilong kisim bek yumi. Tasol bihain long indai bilong em, em i laik stap wantaim yumi long olgeta tabernakel bilong dispela graun, bai ol manmeri i ken kam long em na visitim em. Na taim Jisas i painim wanpela gutpela man o meri husat i save kam na adorim em, em i amamas stret. Jisas i amamas namel long ol dispela kain manmeri. Na wankain olsem Jisas i save amamas namel long ol manmeri, yumi ol manmeri tu i mas amamas wantaim em. Long dispela graun, taim wanpela king i singautim wokboi nating bilong em bilong sindaun long tebol bilong king na serim ol gutpela kaikai, dispela wokboi nating i save amamas tru. Holi yukaris i winim dispela pasin bilong dispela king, long wanem taim yumi i kam insait long haus lotu, yumi i no kam insait long wanpela haus bilong king, tasol yumi i kam insait long haus bilong God yet, na God yet i wetim yumi long tabernakel, bai

yumi i ken stori wantaim em. Na olsem yumi i mas yusim gut dispela sans em i save givim long yumi, nogut Jisas i wetim yumi nating long tabernakel.

Nau Jisas, mi stap long ai bilong yu. Yu Bikpela na God bilong mi. Yu stap long tabernakel, em i haus we yu save stap olgeta de na olgeta nait. Yu as bilong olgeta gutpela samting. Yu dokta bilong sol bilong mi, na yu tasol i save oraitim mi. Nau mi kam long yu, na mi man bilong mekim planti sin tumas. Tasol mi kam long yu olsem wanpela man i dai long wara i ran i go long raunwara bilong dring. Olsem tasol mi kam long yu bilong askim yu long marimari long mi. Mi no laik givap, long wanem mi save olsem yu ken marimari long mi na mekim mi i stap gut gen.

Mi adorem yu, mi tenkyu long yu na mi laikim yu moa long olgeta samting. Na tude mi laik askim dispela samting tasol long yu: helpim mi long laikim yu tru wantaim olgeta strong bilong mi, bai mi i ken abrusim ol sin na stap gut. Mi no laik givim pen long yu. Jisas, mi laikim yu tru.

Mama Maria, ol was santu bilong mi, ol ensel i stap long heven, yupela tu i mas helpim mi long laikim Jisas antap long olgeta samting.

SOTPELA PREA LONG JISAS

JISAS, YU GUTPELA WASMAN BILONG MIPELA,
MARIMARI LONG MIPELA.

SAMBAI LONG MIPELA NA LUKAUTIM MIPELA,
NA MEKIM MIPELA I KAMAP
LONG AMAMAS BILONG YU LONG HEVEN.

Yumi i mas beten Spiritual Komunio i stap long pes 6

VISITIM SANTU MARIA

Pasin bilong onarim santu Maria em i wanpela gutpela sen bilong kisim yumi i go long heven. Na olsem yumi i askim Mama Maria long holimpasim yumi strong, bai yumi i ken pas oltaim wantaim em, na bai yumi i no inap lusim em.

SOTPELA PREA LONG SANTU MARIA

O KLEMEN, O NAISPELA,
O GUTPELA VIRGO MARIA!

Yumi i mas beten Prea long santu Maria i stap long pes 7

VISITIM SANTU JOSEP

Santu Jon Damasin i tok olsem God Papa i bin givim long santu Josep 3-pela gutpela samting, bai em i ken lukautim gut Holi Famili bilong Jisas na Maria: 1) God Papa i bin givim santu Josep bikpela laik tru; 2) pasin bilong sambai gut long Jisas na santu Maria; 3) na pasin bilong bosim haus. Santu Josep i bin stap olsem het bilong Holi Famili, na Jisas i bin harim tok bilong em oltaim, olsem wanpela pikinini i save harim tok bilong papa bilong em. Santu Josep tu i bin sambai gut long Holi Famili, na em i bin lukautim pikinini Jisas na santu Maria olsem wanpela gutpela man i save lukautim meri na ol pikinini bilong em. Na santu Josep i bin laikim tru santu Maria na Jisas, na i no gat wanpela man long dispela graun i ken winim santu Josep long dispela pasin bilong laikim Jisas na Maria. Nogat tru. Laik bilong santu Josep i go long santu Maria na long pikinini Jisas i winim laik bilong olgeta manmeri bilong dispela graun.

Na olsem, santu Josep, tude mi kam long yu bilong askim
yu long helpim mi long laikim Jisas na santu Maria olsem yu
yet i bin laikim ol.

SOTPELA PREA LONG SANTU JOSEP
YU GUTPELA WASMAN
BILONG MAMA MARIA NA PIKININI JISAS,
YU GUTPELA WASMAN BILONG MI TU.

Yumi i mas beten Prea long santu Josep i stap long pes 8

DE NAMBA 4

Pastaim yumi i mas beten Prea long Jisas i stap long pes 5

VISITIM JISAS

Ol manmeri i amamas tumas long stap wantaim ol pren bilong ol, na ol bai stori, na lap na amamas tasol. Ol i no save les long stap wantaim ol pren, long wanem, ol i laikim ol pren tumas. Olsem tasol, sapos yumi i laikim Jisas, yumi bai amamas tasol long go long haus lotu na prea na stori wantaim em. Sapos yumi i les, i min olsem yumi i no laikim Jisas tumas. Ol santu taim ol i bin stap long dispela graun, ol i bin amamas tasol long visitim Jisas i stap long tabernakel. Bihain long santu Teresa i dai, em i bin kamap long wanpela sista na tokim em olsem: «Mipela ol lain i stap long heven na yupela ol lain i stap yet long graun, yumi olgeta i mas kamap wanpela lain tasol. Long heven mipela inap long lukim God Triwan, na long graun yupela inap long lukim Jisas i stap long hostia». Na olsem santu sakramen bilong alta em i olsem heven i stap long graun. Taim yumi i lukim Jisas i stap long hostia, yumi i lukim

God yet. Na God i strong olgeta husat i save stap long heven, em i stap long tabernakel bilong yumi tu.

Jisas, yu Lem bilong God na yu bin dai bilong helpim mi! Plis no ken lustingting long mi. Yu bin karim bikipela pen bilong helpim mi, na olsem nau mi askim yu long strongim mi, bai mi no ken lusim yu gen. Mi bilong yu tasol.

Na olsem nau, long ai bilong yu, mi laik givim mi yet olgeta long yu, bai yu ken mekim long mi long laik bilong yu. Kisim mi, Jisas, bai mi ken stap oltaim wantaim yu. Mi no laik tingting moa long amamas bilong dispela graun. Nogat tru. Mi laik tingting long givim ona na glori long yu tasol. Na olsem yu ken rausim olgeta samting nogut i stap long mi, na mekim mi i kamap nupela man. Mi laikim yu tumas, Jisas, yu ridima bilong mi. Tasol laik bilong mi i go long yu em i liklik tumas. Na olsem plis helpim mi, bai laik bilong mi i ken kamap bikipela tru.

SOTPELA PREA LONG JISAS

JISAS, MI GIVIM MI YET LONG YU.

MEKIM LONG MI LONG LAIK BILONG YU!

Yumi i mas beten Spiritual Komunio i stap long pes 6

VISITIM SANTU MARIA

Maria i save mekim ol sol i kamap naispela tru long ai bilong Jisas. Wanpela de santu Maria Magdalena bilong Pazzi i lukim Maria i holim wanpela marasin long han bilong em, na taim wanpela man o meri i dringim dispela marasin, Maria i givim long ol, hat bilong ol dispela lain i kamap bikipela na ol i inap

long laikim Jisas moa moa yet. Na olsem nau mipela i askim
Maria long helpim mipela tu long laikim Jisas moa moa yet.

SOTPELA PREA LONG SANTU MARIA
MAMA BILONG MI, YU HOP BILONG MI,
MEKIM MI I LAIKIM JISAS TASOL.

Yumi i mas beten Prea long santu Maria i stap long pes 7

VISITIM SANTU JOSEP

Maski Jisas em i God tru, taim em i kamap man na em i stap
long dispela graun, em i daunim em yet na em i harim tok
bilong santu Josep oltaim. Jisas yet i bin onarim santu Josep
na bihainim laik bilong em, na olsem mipela tu i mas onarim
dispela santu na harim ol tok bilong em.

Santu Josep, yu waspapa bilong Jisas na yu waspapa bilong
mipela tu, na mipela i laik kamap gutpela pikinini bilong yu,
olsem Jisas yet i bin stap gutpela pikinini bilong yu. Na mipela
i save olsem yu bai laikim mipela tru olsem wanpela papa i
save laikim ol pikinini bilong em. Na mipela i askim yu long
helpim mipela nau na long taim mipela i dai.

SOTPELA PREA LONG SANTU JOSEP
SANTU JOSEP, HELPIM MIPELA
LONG RAN I KAM LONG YU
BILONG KISIM HELPIM BILONG YU OLTAIM!

Yumi i mas beten Prea long santu Josep i stap long pes 8

DE NAMBA 5

Pastaim yumi i mas beten Prea long Jisas i stap long pes 5

VISITIM JISAS

Long Buk bilong ol Sam profet Devit i tok olsem: *Ol liklik pisin i bin wokim haus klostu long alta bilong yu na ol i save lukautim ol pikinini bilong ol. Ol manmeri i save stap long haus bilong yu, ol i save belgut tru, na oltaim ol i save singim song bilong litimapim nem bilong yu* (Sam 84:3-4). Jisas, yu king bilong mi na yu God bilong mi. Na yu olsem dispela ol pisin profet Devit i tok, husat i bin wokim haus bilong ol klostu long alta bilong God. Yu tu Jisas i bin putim haus bilong yu insait long haus lotu bilong mipela. Na olsem taim ai bilong mipela i lukluk i go long tabernakel, mipela inap lukim haus bilong yu stret.

Na long dispela pasin bilong yu mi luksave long bikipela laik bilong yu i go long ol manmeri. Planti tabernakel tru i stap long olgeta hap bilong graun, na olsem mipela i luksave yu bin wokim haus bilong yu namel long olgeta vilis na ples long olgeta hap bilong graun, bai olgeta

manmeri i ken kam na visitim yu. Na yu stap namel long mipela tu, long ples bilong mipela yet. Na olsem yu mas helpim mipela, bai mipela i ken adorim yu na laikim yu tru, wantaim olgeta strong bilong mipela.

Jisas, planti taim mi save askim mi yet olsem: «Olsem wanem? Jisas i bin lusim laip bilong em bilong helpim olgeta manmeri, tasol liklik lain tasol i save kam na visitim em long tabernakel na long adoresen». Na olsem Jisas mi laik stap gut na mi no laik kamap olsem ol dispela lain manmeri husat i save lustingting long yu na lusim yu i stap wanpis long haus lotu.

Jisas mi no laik wari tumas long ol samting bilong dispela graun. Mi laik tingting long yu tasol. Tingim Pen na Indai bilong yu na helpim mi long laikim yu moa moa yet.

Jisas, yu ridima bilong mi. Mi laikim yu na mi adorim yu. Yu as bilong olgeta gutpela samting. Yu amamas bilong mi. Yu laik bilong mi.

SOTPELA PREA LONG JISAS

JISAS, YU BIN GIVIM YU YET OLGETA LONG MI.
NAU MI LAIK GIVIM MI YET OLGETA LONG YU.

Yumi i mas beten Spiritual Komunio i stap long pes 6

VISITIM SANTU MARIA

Maria, Santu Bernard i save kolim yu «meri bilong stilim lewa», bikos yu save winim ol lewa bilong ol manmeri. Em i tok olsem gutpela pasin na biuti bilong yu i bikpela tumas, na olsem ol manmeri i save givim lewa bilong ol long yu. Na

olsem mi laik askim yu, bai yu ken stilim lewa bilong mi tu.
Kam, Mama, kisim lewa bilong mi na givim long Jisas.

SOTPELA PREA LONG SANTU MARIA
MAMA BILONG GUTPELA PASIN,
PREA BILONG HELPIM MI.

Yumi i mas beten Prea long santu Maria i stap long pes 7

VISITIM SANTU JOSEP

Long Buk Baibel i gat stori bilong Josua, na i tok olsem:
Long dispela de Bikpela i helpim ol Israel, na ol i daunim ol Amor.
Josua i beten long Bikpela, na long ai bilong ol Israel, em i tok
olsem: «San, yu sanap antap long Gibeon. Mun, yu sanap antap
long ples daun bilong Aijalon». Na san i sanap i stap na mun i no
i go daun inap ol Israel i winim ol birua. San i no i go daun kwik.
Em i sanap i stap long skai inap olsem wanpela de olgeta (Josua
10:12-13).

Josua i mekim san i harim tok bilong em, na san i sanap na
i no go daun kwik, na em i sanap i stap long skai longpela
taim tru. Tasol santu Josep i winim Josua, long wanem, Josua
i mekim san i harim tok bilong em, tasol santu Josep i mekim
God yet i harim tok bilong em. Long wanem Jisas em i God
tru, na taim Jisas em i liklik pikinini, em i save harim tok
bilong santu Josep na bihainim laik bilong em oltaim.

Santu Josep, plis beten long Jisas bilong helpim mi. Askim
Jisas long pogivim olgeta sin bilong mi. Na askim em long
mekim laik bilong mi i kamap bikpela tru, bai mi ken laikim
em wantaim olgeta strong bilong mi.

SOTPELA PREA LONG SANTU JOSEP
SANTU JOSEP, HELPIM MI
LONG BIHAINIM LAIK BILONG GOD OLTAIM.

Yumi i mas beten Prea long santu Josep i stap long pes 8

DE NAMBA 6

Pastaim yumi i mas beten Prea long Jisas i stap long pes 5

VISITIM JISAS

Jisas i tok: *Long ples ol gutpela samting bilong yu i stap long en, long dispela ples tasol laik bilong yu tu bai i stap* (Matyu 6:21). I min olsem, hat o lewa bilong yumi i save stap long ples ol gutpela samting bilong yumi i stap long em. Long dispela as tasol, hat o lewa bilong ol santu i bin stap long santu yukaris, long wanem ol i no bin laikim wanpela samting ausait long Jisas.

Jisas bilong mi, laik bilong yu i kam long mi i mekim yu i stap hait long tabernakel long olgeta de na nait. Helpim mi, bai hat bilong mi i ken laikim yu tru na mi ken pas wantaim yu oltaim. Mi no laik givim hat bilong mi long ol samting bilong dispela graun. Nogat tru. Mi laik givim hat bilong mi long yu tasol. Tingim Pen na Indai bilong yu, na helpim mi.

Yu Ridima bilong mi! Yu bin kamap man bilong soim bikpela laik bilong yu i kam long mipela, na yu bin dai bilong kisim bek mipela. Na tu yu bin haitim yu yet long yukaris, bai oltaim mipela i ken kam na visitim yu. Long santu yukaris yu

kamap kaikai bilong mipela, na yu gutpela pren i save stap oltaim wantaim mipela.

Pastaim taim Mama Maria i karim yu, yu bin kamap long ai bilong ol manmeri olsem wanpela liklik pikinini i krai long bokis kaikai bilong ol bulmakau. Bihain yu bin kamap bikpela, na yu bin kamap long ai bilong ol manmeri olsem wanpela kamda i no gat planti samting. Na bihain yu bin inapim wok salvesen bilong yu na yu bin kamap long ai bilong ol manmeri olsem wanpela man nogut i hangamap long diwai kros. Na nau, Jisas, yu stap long ai bilong mipela olsem bret antap long alta. Taim mipela i lukim holi yukaris ai bilong mipela i save giamanim mipela, long wanem ai bilong mipela i lukim bret tasol, tasol bilip bilong mipela i skulim mipela olsem yukaris i no bret moa, em yu yet.

Jisas, helpim mi long bekim long yu ol gutpela samting yu bin givim long mi bilong helpim mi. Bikpela, mi laik laikim yu tasol. Sapos mi no yusim laip bilong mi bilong laikim yu, laip bilong mi em i samting nating tru. Yu bin givim laip bilong yu bilong helpim mi, na olsem tasol nau mi laik givim laip bilong mi long yu. Yu gutpela tumas, yu naispela tru, mi laik laikim yu tasol.

Mi laik tingim ol gutpela samting yu bin mekim bilong soim laik bilong yu i go long mi, na dispela samting bai helpim mi long mekim laik bilong mi i go long yu i kamap bikpela moa yet.

SOTPELA PREA LONG JISAS
BIKPELA BILONG MI,
PASTAIM LONG INDAI BILONG MI,
MI LAIK MEKIM PLANTI GUTPELA PASIN
BILONG SOIM LAIK BILONG MI I GO LONG YU.

Yumi i mas beten Spiritual Komunio i stap long pes 6

VISITIM SANTU MARIA

Maria em i olsem wanpela naispela plawa i kamap long gaden, na man o meri i painim em, i save amamas tru. Santu Bernard i tok olsem i no gat wanpela man o meri husat i bin askim helpim bilong santu Maria, na Maria i bin les long harim prea bilong dispela man o meri. Nogat tru. Wantu tasol santu Maria bai helpim dispela man o meri. Olsem tasol, Mama bilong mi, mi askim yu long harim ol prea bilong mi, na yu no ken les long helpim mi.

SOTPELA PREA LONG SANTU MARIA
O MARIA! GIVIM GRASIA LONG MI
BAI MI NO KEN LUSTINGTING LONG YU
NA MI KEN KAM OLTAIM
LONG ASKIM HELPIM BILONG YU.

Yumi i mas beten Prea long santu Maria i stap long pes 7

VISITIM SANTU JOSEP

God Papa i bin tokim santu Brigit olsem: «Taim pikinini bilong mi i bin stap long graun, oltaim em i bin harim tok bilong santu Josep. Na Jisas i no bin mekim wanpela samting sapos santu Josep i no givim tok orait long em pastaim». Jisas i bin bihainim laik bilong santu Josep oltaim, long wanem God i bin makim santu Josep olsem waspapa bilong em.

O santu Josep! Mi tu laik harim tok bilong yu oltaim, wankain olsem Jisas yet i bin harim. Helpim mi, bai mi ken givim amamas long God tasol na sevim sol bilong mi.

SOTPELA PREA LONG SANTU JOSEP
SANTU JOSEP, HELPIM MI
LONG HARIM TOK BILONG JISAS,
BILONG YU NA BILONG SANTU MARIA OLTAIM.

Yumi i mas beten Prea long santu Josep i stap long pes 8

DE NAMBA 7

Pastaim yumi i mas beten Prea long Jisas i stap long pes 5

VISITIM JISAS

Jisas em i gutpela wasman bilong ol sipsip. Na em i lusim laip bilong em bilong helpim yumi, ol sipsip bilong em. Tasol pastaim long em i dai, em i no laik lusim yumi i stap nating olsem pikinini i no gat papamama. Nogat. Em i laik stap wantaim yumi oltaim inap long dispela taim i pinis. Em yet i tokim yumi pinis olsem: *Harim. Mi save stap wantaim yupela olgeta de, i go inap long dispela taim i pinis* (Matyu 28:20). Na olsem Jisas i tokim yumi olsem: «Lukim mi. Mi stap oltaim wantaim yupela. Mi stap long yukaris. Yupela i ken painim mi long tabernakel. Mi stap long yukaris bilong harim ol singaut bilong yupela na bilong helpim yupela. Mi no inap lusim yupela. Mi bai stap olgeta de na olgeta nait inap long dispela taim i pinis».

Santu Pita bilong Alkantara i tok olsem taim Jisas i go bek long heven, em i no laik lusim Sios bilong em i stap nating. Na olsem em yet i bin kamapim dispela sakramen

bilong alta, bai Sios na ol katolik bilipmanmeri i ken painim em long tabernakel.

Jisas, yu Sevia bilong mi na yu gutpela tumas! Tude mi kam long haus lotu na mi stap long ai bilong yu. Mi kam bilong visitim yu. Na taim yu kam insait long mi long santu komunio, yu givim bikipela amamas long mi na yu soim bikipela laik bilong yu i kam long mi. Long santu komunio yu kamap kaikai bilong mi, na yu givim yu yet olgeta long mi. Na olsem mi inap tok «Jisas, yu bilong mi olgeta».

Na wankain olsem yu save givim yu yet olgeta long mi, mi sapos long givim mi yet olgeta long yu. Mi samting nating na yu king bilong heven na graun. Olgeta taim mi save tokim yu olsem mi laikim yu, tasol planti taim ol pasin bilong mi i no gutpela tumas. Helpim mi, bai ol pasin bilong mi tu i ken soim bikipela laik bilong mi. Yu inap long strongim mi. Tingim Pen na Indai bilong yu na helpim mi long kamap gutpela kristen long ai bilong yu. Mi laik mekim wok bilong yu tasol na mi laik givim amamas tasol long yu.

Laikim yu moa long olgeta samting em bai gutpela pe bilong mi. O Pikinini bilong God! Kisim ol samting bilong mi, na givim yu yet long mi. Mi laikim yu na mi laik painim yu tasol. Mi laikim yu... Mi laikim yu... Mi laikim yu...

SOTPELA PREA LONG JISAS
JISAS BILONG MI,
HELPI MI LONG PAS TRU WANTAIM YU.

Yumi i mas beten Spiritual Komunio i stap long pes 6

VISITIM SANTU MARIA

Maria, yu gutpela Mama bilong mi. Mama Sios i save kolim yu «hop bilong mipela». Na em i tru, long wanem mipela i trastim yu. Santu Bernard i tok olsem: «Man i lusim hop bilong em pinis, em i ken hop yet long Maria, na Maria bai helpim em». Mi tu, Mama! Mi putim olgeta hop bilong mi long han bilong yu.

SOTPELA PREA LONG SANTU MARIA
MARIA, MAMA BILONG GOD,
PREA LONG JISAS BILONG HELPIM MI.

Yumi i mas beten Prea long santu Maria i stap long pes 7

VISITIM SANTU JOSEP

Maski santu Josep i no trupela papa bilong Jisas, em i trupela man bilong Maria, na Maria em i trupela mama bilong Jisas. Na olsem mipela i save kolim em «waspapa» bilong Jisas. God yet i bin makim santu Josep bilong maritim santu Maria, bai em i ken lukautim Maria na pikinini Jisas.

Na olsem mi onarim yu, santu Josep. Holi Spirit yet i bin makim yu bilong maritim santu Maria. Na Holi Spirit yet i bin makim yu bilong inapim dispela wok bilong waspapa bilong pikinini Jisas. Na mipela i save yu bin inapim gut dispela wok Holi Spirit i bin givim long yu. Na olsem tude mi laik askim yu, bai yu prea long meri bilong yu Maria na long Jisas tu, bai tupela i ken helpim mi long olgeta samting mi sot long em.

SOTPELA PREA LONG SANTU JOSEP
SANTU JOSEP, SAMBAI LONG MI NAU
NA LONG TAIM BILONG INDAI BILONG MI TU.

Yumi i mas beten Prea long santu Josep i stap long pes 8

DE NAMBA 8

Pastaim yumi i mas beten Prea long Jisas i stap long pes 5

VISITIM JISAS

Long Buk Baibel i gat tok olsem: *Naispela pren bilong mi, yu kam ausait, na yu kam wantaim mi* (Song bilong Solomon 2:13). Dispela tok Jisas tu i save autim long olgeta manmeri husat i save kam na adorim em long santu yukaris. Em i save tok olsem: «O sol bilong mi! Kam ausait na kam visitim mi! Mi inap long lusim ol rong bilong yu na oraitim yu. Kam wantaim mi! No ken pret long mi, na kam klostu long mi hariap. Long dispela sakramen mi no stap olsem wanpela strongpela king. Nogat. Mi bin daunim mi yet na mi kamap olsem bret, bai yu no ken pret long mi. Yu naispela pren bilong mi. Yu no birua bilong mi, long wanem mi laikim yu na yu save laikim mi tu. Kam wantaim mi. Holimpasim mi na askim long mi olgeta samting yu sot long em».

Santu Teresa i tok olsem maski Jisas em i king bilong glori na bilas bilong em long heven i bikpela tru, taim em i stap long sakramen bilong alta em i kamap olsem bret, bai yumi i

no ken pret long kam long em. Na olsem yumi i mas kam klostu long em wantaim bikipela amamas na konfidens.

Taim mi sanap klostu long yu, Jisas, mi amamas stret na mi guria, long wanem mi save olsem yu king bilong heven na graun. Maria, yu mas helpim mi long laikim Jisas oltaim. Na yu tu, Jisas, helpim mi, bai hat bilong mi i ken laikim yu tasol.

Tude mi laik givim tingting bilong mi long yu, bai mi ken tingting long yu tasol. Mi laik givim bodi bilong mi tu, bai mi ken mekim planti gutpela pasin. Mi laik givim sol bilong mi tu, bai yu ken kamap king bilong em. Na mi laik bai olgeta manmeri bilong dispela graun i ken luksave long bikipela laik bilong yu i go long ol.

Long tude i kam inap long las de bilong laip bilong mi, mi laik givim amamas long yu tasol. Bai mi wok hat bilong abrusim olgeta pasin nogut. Maski mi mas i dai, mi no laik mekim sin moa. Na mi redi long lusim laip bilong mi bilong soim laik bilong mi i go long yu.

SOTPELA PREA LONG JISAS **JISAS, KISIM MI NA HOLIMPASIM MI.**

Yumi i mas beten Spiritual Komunio i stap long pes 6

VISITIM SANTU MARIA

Maria em i olsem wanpela gutpela mama i save lukautim gut ol pikinini bilong em. Wanpela santu i tok olsem laik bilong Mama Maria i kam long mipela wan wan i winim laik bilong olgeta mama bilong dispela graun i go long ol pikinini bilong ol. Mama bilong mi! Yu Mama bilong grasia na Mama bilong

sol bilong mi! Mi save olsem yu laikim mi tru na yu laik bai mi ken kamap long heven bilong amamas wantaim yu oltaim oltaim. Helpim mi oltaim.

SOTPELA PREA LONG SANTU MARIA
MAMA BILONG MI,
HELPI MI LONG TINGIM YU OLTAIM!

Yumi i mas beten Prea long santu Maria i stap long pes 7

VISITIM SANTU JOSEP

Santu Teresa i tok olsem mipela i no ken tingting long santu Maria tasol na lustingting long santu Josep. Nogat. Long wanem santu Maria na santu Josep i bin stap wantaim planti yia long dispela graun, na olsem oltaim yumi i mas tingim tupela wantaim. Oltaim santu Josep i bin stap klostu long santu Maria na em i bin helpim Maria long olgeta samting.

O santu Josep! Tingim bikpela laik bilong yu i go long Maria, na helpim mi long kamap gutpela wokboi nating bilong em. Mi laik laikim Mama Maria na wok hat bilong givim amamas long em na onarim nem bilong em. Santu Josep, yu mas helpim mi, bikos long strong bilong mi tasol, mi no inap.

SOTPELA PREA LONG SANTU JOSEP
DIA SANTU JOSEP, HELPI MI
LONG ONARIM JISAS NA SANTU MARIA
OLSEM YU YET I BIN ONARIM OL.

Yumi i mas beten Prea long santu Josep i stap long pes 8

DE NAMBA 9

Pastaim yumi i mas beten Prea long Jisas i stap long pes 5

VISITIM JISAS

Jisas i stap long santu sakramen bilong alta olsem wanpela mama i laik givim susu long liklik pikinini bilong em. Jisas i redi long givim yumi olgeta gutpela samting yumi i sot long em.

Wanpela de wanpela santu i lukim Jisas i sanap i stap na tupela han bilong em i pulap long planti gutpela samting, tasol i no gat man i kam bilong askim wanpela samting. I min olsem, Jisas i redi long helpim yumi, tasol sapos yumi i les long visitim em, em i no inap long givim ol dispela gutpela samting long yumi. Na santu Katerin i save ran i kam long Jisas i stap long yukaris olsem wanpela liklik pikinini i save kam i ran long mama bilong em bilong kisim kaikai.

O gutpela Jisas! Mi mas laikim yu tasol. Na mi laik laikim yu moa long olgeta samting, tasol hat bilong mi i liklik tumas. Mi man bilong mekim sin na planti taim mi bin givim baksait long yu, na olsem mi save mi no gutpela man inap long stap klostu long yu. Tasol yu pulap long marimari, na yu tokim mi

olsem: «Yu kam, no ken pret, na givim dispela liklik hat bilong yu long mi».

Planti taim mi sapos long go long hel long ol sin bilong mi, tasol yu bin pogivim mi. Tasol nau mi no laik mekim sin moa, na mi laik givim mi yet long yu. Yu king bilong mi na Bikpela bilong mi. Kisim dispela liklik hat bilong mi na mekim em i kamap bikpela tru, bai mi inap long laikim yu moa moa yet.

Helpim mi, Bikpela, long tanim bel na lusim ol sin bilong mi. Helpim mi, bai long tude i kam inap long las de bilong laip bilong mi, mi ken abrusim ol sin na givim amamas long yu.

SOTPELA PREA LONG JISAS
JISAS, YU GOD BILONG MI.
HELPIM MI LONG LAIKIM YU TRU!

Yumi i mas beten Spiritual Komunio i stap long pes 6

VISITIM SANTU MARIA

Mama Sios i save kolim Maria «Mama bilong marimari», na olsem Maria i kamap olsem Jisas, long wanem Jisas em i God bilong marimari. Olsem na yumi i no ken pret long kam long Maria, long wanem em i gat bikpela laik bilong helpim yumi!

SOTPELA PREA LONG SANTU MARIA
MARIA, YU HOP BILONG MI!

Yumi i mas beten Prea long santu Maria i stap long pes 7

VISITIM SANTU JOSEP

Buk bilong Gutnius i tok olsem: *Ensel bilong Bikpela i kamap long Josep long driman. Ensel i tok olsem: «Yu kirap na kisim pikinini wantaim mama bilong em, na yu ranawe i go long Isip»* (Matyu 2:13). Em i olsem God i tokim Josep olsem: «Josep, bai mi salim pikinini bilong mi i kam long graun. Em bai daunim em yet na long ai bilong ol manmeri em bai i stap olsem wanpela kamda i no gat planti samting. Planti manmeri bai i givim baksait long em. Tasol mi makim yu bai yu ken sambai gut long em».

God yet i bin makim santu Josep bilong lukautim Jisas na Maria. Helpim mi, santu Josep, long lustingting long ol samting bilong dispela graun olsem Jisas yet i bin mekim taim em i kamap man na i kamap namel long mipela olsem wanpela kamda.

SOTPELA PREA LONG SANTU JOSEP

SANTU JOSEP, HELPIM MI LONG DAUNIM MI YET
NA BIHAINIM PASIN ISI BILONG JISAS OLTAIM.

Yumi i mas beten Prea long santu Josep i stap long pes 8

DE NAMBA 10

Pastaim yumi i mas beten Prea long Jisas i stap long pes 5

VISITIM JISAS

Santu Ogastin i tok olsem ol man i save tingting long ol samting bilong dispela graun tasol, ol i olsem ol longlong man i no gat tingting na ol i olsem ol animal. Na taim ol i laik kisim amamas, ol i save painim amamas long ol samting bilong dispela graun. Tasol amamas bilong dispela graun em i samting nating na i save pinis hariap. Jisas tasol inap long givim trupela amamas i no save pinis. Na olsem, sol bilong mi i no ken paul nabaut. Sol bilong mi i mas wok hat bilong painim God tasol, long wanem em tasol i as na Papa bilong olgeta gutpela samting. Na sapos yumi i laik painim God hariap, yumi i mas i go na visitim em long tabernakel. Em i hait i stap, na em i redi long harim yumi na givim bel isi long yumi.

Santu Teresa i tok olsem long dispela graun em i hat tumas long toktok wantaim ol king. Ol manmeri i no gat sans long toktok wantaim king bilong ol, long wanem ol king ol i bikpela samting tumas, na ol i no save daunim ol yet bilong

toktok wantaim ol manmeri nating. Tasol Jisas em i narakain olgeta. Jisas em i King bilong glori, na em i redi oltaim long toktok wantaim yumi. Taim yu laik toktok wantaim King Jisas, yu mas go klostu long santu sakramen bilong alta, na yu bai painim Jisas i redi long harim ol singaut bilong yu. Ol king bilong dispela graun i no save toktok wantaim ol manmeri nating, tasol King Jisas i save wetim yumi long olgeta de na long olgeta nait long santu sakramen, na em redi oltaim long toktok wantaim yumi.

O sakramen bilong bikpela laik bilong Jisas! Taim yu kam long mi long santu komunio na taim yu stap hait long tabernakel, yu save mekim hat bilong mi i laikim yu tumas! Mekim bai hat bilong mi i ken laikim yu moa moa yet! Mi laik kamap wokboi nating bilong yu tasol, bai mi ken stap oltaim aninit long yu.

Tude mi laik givim olgeta samting bilong mi long yu. Mi laik givim hat bilong mi long yu, na ol hop bilong mi, na bodi bilong mi tu na olgeta samting bilong mi i go long yu. Na mi askim yu long kisim mi wantaim olgeta samting bilong mi, bai yu ken kamap masta bilong mi inap oltaim. Na mekim long mi long laik bilong yu, Jisas. Mi laik bihainim laik bilong yu oltaim tasol. Mekim mi i pas wantaim yu. Taim mi stap laip na taim mi dai, mi laik pas wantaim yu tasol. Yu bin dai bilong soim laik bilong yu i go long mi, olsem tasol mi laik dai bilong soim laik bilong mi i go long yu.

Na nau mi tingting long ol sin mi bin mekim na mi sori tru, Jisas. Mi laikim yu!

**SOTPELA PREA LONG JISAS
LAIK BILNG GOD, YU LAIK BILONG MI!**

Yumi i mas beten Spiritual Komunio i stap long pes 6

VISITIM SANTU MARIA

Maria, Kwin bilong heven, i tokim yumi olsem: «Olgeta gutpela samting i stap long han bilong mi, na mi laik givim long ol manmeri i save laikim mi tru». Na olsem sapos yumi i laik kisim ol dispela gutpela samting, yumi i mas laikim Maria. Wampela santu i kolim santu Maria «Meri i save lukautim na tilim ol grasia bilong God». Man o meri i laikim Maria, em i ken amamas!

SOTPELA PREA LONG SANTU MARIA MAMA BILONG GUTPELA PASIN, PREA BILONG HELPIM MI.

Yumi i mas beten Prea long santu Maria i stap long pes 7

VISITIM SANTU JOSEP

God yet i bin putim santu Josep olsem hetman bilong Holi Famili bilong Nasaret. Long ai bilong ol manmeri, dispela famili em i liklik tumas. Tasol long ai bilong God, em i bikpela tru na i no gat narapela famili long graun i ken winim em. Nogat tru. Na long dispela famili santu Josep i bin stap olsem hetman. Na Jisas i bin harim tok bilong Josep oltaim. Na long dispela as tasol santu Josep i winim ol narapela santu, tasol em i no winim Mama Maria.

Kisim mi, O santu Josep, olsem wokboi nating bilong yu, na helpim mi long harim tok bilong yu oltaim.

SOTPELA PREA LONG SANTU JOSEP
SANTU JOSEP,
YU GUTPELA WASMAN BILONG HOLI FAMILI,
PREA BILONG HELPIM MI.

Yumi i mas beten Prea long santu Josep i stap long pes 8

DE NAMBA 11

Pastaim yumi i mas beten Prea long Jisas i stap long pes 5

VISITIM JISAS

Santu Teresa i tok olsem yumi i mas wok hat bilong pas wantaim Jisas. Yumi i no ken lusim em. Jisas em i wasman bilong yumi na yumi ol sipsip bilong em, na olsem yumi i mas kam klostu long em, bai em i ken givim kaikai long yumi. Na sapos wasman bilong ol sipsip i go malolo na i slip stap, ol sipsip bilong em bai stap klostu long em inap long taim em i kirap long slip. Ol sipsip i no save lusim wasman bilong ol. Nogat. Olsem tasol yumi i no ken lusim Jisas.

Jisas, yu Ridima bilong mi! Nau mi kam klostu long yu, na mi laik laikim yu moa yet na stap oltaim wantaim yu.

Mi laik tenkim yu long wanem bilip bilong mi i skulim mi olsem yukaris i no bret nating. Maski ai bilong mi i lukim yukaris em i olsem bret, bilip bilong mi i tokaut klia olsem yukaris em i trupela bodi bilong Bikipela bilong mi, Jisas Krais. Na long bikipela laik bilong em tasol em i stap long yukaris. Jisas, mi no inap long lukim yu wantaim ai bilong

bodi bilong mi, tasol bilip bilong mi i save olsem yu stap hait long yukaris. Jisas, yu hop bilong mi, yu salvesen bilong mi, yu strong bilong mi na yu tasol inap long givim bel isi long mi. Mi laik bai yu kamap masta bilong mi. Na mi no laik tingting moa long ol samting bilong graun, mi laik tingting long yu tasol.

Mi save olsem amamas bilong heven i winim tru amamas bilong graun, na long heven yu amamas oltaim. Na dispela amamas bilong yu i save givim amamas long mi tu. Amamas bilong yu i no inap pinis na i save stap oltaim oltaim.

Maria, yu Mama bilong Jisas, yu mas helpim mi bai mi tu i ken kamap long bikpela amamas bilong heven wantaim pikinini bilong yu Jisas.

SOTPELA PREA LONG JISAS
YU JISAS BILONG MI,
MI LAIK STAP BILONG YU TASOL.

Yumi i mas beten Spiritual Komunio i stap long pes 6

VISITIM SANTU MARIA

Taim wanpela tarangu man i sanap long dua bilong wanpela maniman, em i inap long kisim sampela gutpela samting long han bilong dispela maniman. Na sapos maniman i givim sampela gutpela samting long em, dispela tarangu i save amamas stret. Olsem tasol yumi ol manmeri bilong sin i mas sanap klostu long dua bilong santu Maria, bai em i ken pulapim yumi long bikpela marimari bilong em. Na yumi tu bai amamas moa yet sapos yumi i wok hat bilong bihainim klinpela pasin na daunpasin bilong em.

SOTPELA PREA LONG SANTU MARIA
MARIA, YU HOP BILONG MI,
PLIS KAM NA HELPIM MI.

Yumi i mas beten Prea long santu Maria i stap long pes 7

VISITIM SANTU JOSEP

Santu Bernard i tok olsem God i bin makim santu Josep bilong mekim tupela wok: nambawan wok bilong em, em i wok bilong lukautim Mama Maria na pikinini Jisas. Na namba tu wok bilong em, em i wok bilong helpim God Triwan long kisim bek ol manmeri. Wok salvesen em i wok bilong God Triwan, tasol God Triwan i bin askim santu Josep long helpim dispela wok salvesen taim em i wok long lukautim Jisas.

Santu Josep, yu wasman bilong mi tu, na olsem mi kam long yu bai yu ken strongim mi long bihainim ol gutpela pasin bilong yu, na long dispela rot mi bai inap long sevim sol bilong mi.

SOTPELA PREA LONG SANTU JOSEP
SANTU JOSEP, SAMBAI LONG MI
BAI MI KEN GO LONG HEVEN.

Yumi i mas beten Prea long santu Josep i stap long pes 8

DE NAMBA 12

Pastaim yumi i mas beten Prea long Jisas i stap long pes 5

VISITIM JISAS

Man o meri i save laikim Jisas, i save kam na stap wantaim em, na Jisas tu i save stap wantaim dispela man o meri. Taim santu Filip Neri i klostu long indai bilong em, ol i kisim yukaris i kam long em. Na taim em i lukim yukaris, em i tok: «Jisas em i hat bilong mi, na lewa bilong mi em i bilong Jisas tasol. Mi laikim em tumas». Na olsem yumi tu, taim mipela i stap klostu long santu sakramen yumi i mas tok: «Jisas, yu lewa bilong mi, na mi laik bai lewa bilong mi i pas wantaim yu inap long las de bilong laip bilong mi».

Jisas, long Buk bilong Gutnius yu yet i tokim mipela olsem sapos wanpela man o meri i laikim yu tru, yu bai laikim em tumas. Na olsem yu mas kam nau na putim haus bilong yu insait long sol bilong mi, bai yu ken stap oltaim wantaim mi. Mi no laik rausim yu. Planti taim mi bin rausim yu long ol sin bilong mi, tasol nau mi laik tanim bel na stap wantaim yu oltaim.

Plis, Jisas! Strongim mi, bai mi ken abrusim ol pasin nogut. Yu save helpim mi long planti gutpela samting, na olsem mi no laik rausim yu gen. Tasol mi pret olsem pasin bilong mi i no gutpela tumas, na olsem mi tok klia long yu nau: mi laik indai, tasol mi no laik mekim sin gen.

Yes, Jisas, mi no laik mekim sin moa. Hat bilong mi i liklik tumas, tasol mi gat bikpela laik long laikim yu moa moa yet. Na bai mi wok hat bilong laikim yu oltaim inap long las de bilong laip bilong mi.

SOTPELA PREA LONG JISAS
JISAS BILONG MI,
MI LAIK LAIKIM YU OLTAIM,
NA MI LAIK BAI YU LAIKIM MI OLTAIM TU.

Yumi i mas beten Spiritual Komunio i stap long pes 6

VISITIM SANTU MARIA

Man o meri i bihainim pasin bilong Maria, bai inap long abrusim olgeta sin. Man o meri i save wok hat bilong givim amamas long Maria, bai kisim bikpela pe long heven. Na man o meri i save toktok long ol arapela manmeri long ol samting bilong Maria, bai i go long heven.

SOTPELA PREA LONG SANTU MARIA
O NAISPELA VIRGO,
HARIM OL PREA BILONG MI!

Yumi i mas beten Prea long santu Maria i stap long pes 7

VISITIM SANTU JOSEP

Buk Baibel i tok olsem santu Josep em i «stretpela man». I min olsem olgeta gutpela pasin i stap long em, na em i no bin mekim wanpela liklik rong. Na olsem santu Josep i pulap long bilip, long hop, long laikim pasin, na em i save laikim God na ol arapela manmeri wantaim olgeta strong bilong em.

O santu Josep, yu gutpela na bikpela eksampel bilong mi! Helpim mi long bihainim ol gutpela pasin bilong yu. Na helpim mi long laikim Jisas na Mama Maria olsem yu yet yu bin laikim tupela.

SOTPELA PREA LONG SANTU JOSEP

SANTU JOSEP,
YU MAN BILONG MARIA,
SOIM ROT LONG MI
BAI MI KEN WOKABAUT
I GO LONG HEVEN.

Yumi i mas beten Prea long santu Josep i stap long pes 8

DE NAMBA 13

Pastaim yumi i mas beten Prea long Jisas i stap long pes 5

VISITIM JISAS

Long Buk Baibel God i tok olsem: «*Oltaim bai mi sambai na redi long harim ol beten yupela i mekim long dispela ples, haus bilong mi i stap long em. Long wanem, mi bin makim dispela haus na em bai i stap haus bilong mi stret, na oltaim ol manmeri i ken kam klostu long mi long dispela haus na lotu long mi. Na oltaim bai mi lukluk i kam long dispela haus, na tingting long em*» (2 Stori 7:15-16). Na Jisas inapim dispela tok long santu sakramen bilong alta, long wanem, em i save stap namel long yumi olgeta de na olgeta nait.

Bikpela bilong mi, long san planti manmeri i save kam na adorim yu. Tasol long nait, taim ol haus lotu i pas, yu stap wanpis long tabernakel na i no gat man i stap wantaim yu. Olsem wanem? Long bikpela laik bilong yu, yu bin kamap olsem man i stap long kalabus, na yu no save lusim tabernakel na yu stap long em long san na long nait, long wanem yu no laik lusim mipela.

Yu Sevia bilong mi! Mi tingting olsem dispela bikpela laik bilong yu i go long mipela i mas strongim mipela long stap

wantaim yu klostu long tabernakel long olgeta de. Na long nait mipela i mas lusim hat bilong mipela insait long haus lotu, bai yu ken kisim ol na ol i ken stap wantaim yu inap long neks de.

Yes, Jisas bilong mi, mi laik givim amamas tasol long yu. Mi laik givim mi yet olgeta long yu. Yu stap long dispela sakramen bai mipela i ken kam na visitim yu, na tu bai mipela i ken kisim yu long santu komunio. Na long dispela rot yu save kam na stap insait long mipela.

Mipela ol manmeri bilong sin na mipela i no gutpela tumas long kisim yu. Tasol laik bilong yu i go long mipela em i bikpela tumas, na olsem yu save amamas tru taim mipela i kam na kisim yu long santu komunio. Yu stap hait long hostia, na yu gat bikpela laik long kam insait long mipela.

Kam, Jisas bilong mi, kam! Mi laik welkamin yu insait long sol bilong mi, bai yu ken kamap Masta bilong mi. Mi laik givim mi yet olgeta long yu.

Mi laikim yu, God bilong mi, na mi laik laikim yu tasol inap oltaim oltaim.

SOTPELA PREA LONG JISAS
KIRAPIM LAIK BILONG MI,
BAI MI KEN LAIKIM YU TRU.

Yumi i mas beten Spiritual Komunio i stap long pes 6

VISITIM SANTU MARIA

Santu Bernard i tok olsem yumi i mas wok hat bilong kisim grasia, na ol grasia i save stap long han bilong Maria.

Santu Pita Demian i kolim Maria «Meri i gat olgeta grasia», na olsem Maria inap long givim grasia long yumi. Na olsem Maria i singautim yumi long kam long em olsem wanpela gutpela mama i save singautim ol liklik pikinini bilong em.

Maria, yu gutpela Mama bilong mi, olsem na lukim mi na harim ol singaut bilong mi.

SOTPELA PREA LONG SANTU MARIA
MARIA,
YU MAMA BILONG JISAS
NA YU MAMA BILONG MI!
YU MAS PREA BILONG HELPIM MI.

Yumi i mas beten Prea long santu Maria i stap long pes 7

VISITIM SANTU JOSEP

Santu Josep em i trupela man bilong Maria, tasol em i bin rispektim bodi bilong Maria oltaim. Santu Josep i bin bihainim klinpela pasin long ai bilong God na long ai bilong ol manmeri. Em i save olsem Maria em i Mama bilong God, na olsem em i rispektim Maria. Klinpela pasin em i bikpela samting long ai bilong God, na santu Josep i bin bihainim dispela gutpela pasin oltaim.

Na olsem yu, santu Josep, yu wasman bilong ol manmeri i save bihainim klinpela pasin na i no save mekim sin i doti long ai bilong God. Na olsem mi askim yu long helpim mi long bihainim ol pasin i klin na long abrusim ol sin i doti long ai bilong God.

SOTPELA PREA LONG SANTU JOSEP
SANTU JOSEP, STRONGIM MI
LONG BIHAINIM KLINPELA PASIN
NA HELPIM MI LONG ABRUSIM OL SIN
I DOTI LONG AI BILONG GOD.

Yumi i mas beten Prea long santu Josep i stap long pes 8

DE NAMBA 14

Pastaim yumi i mas beten Prea long Jisas i stap long pes 5

VISITIM JISAS

Gutpela Jisas, yu stap long tabernakel na mi inap long harim nek bilong yu i tok olsem: *Man bilong graun, sia king bilong mi i stap long dispela haus. Na em i ples bilong ol manmeri i ken i kam na lotu long mi. Bai mi stap bia oltaim, namel long ol manmeri* (Esekiel 43:7).

Jisas, yu yet yu bin makim dispela tabernakel bai yu ken stap long em, na long bikpela laik bilong yu i kam long mi yu save malolo long dispela haus lotu. Na olsem hat bilong mi tu i mas i stap long hia, klostu long yu. Mi laik malolo oltaim klostu long yu.

Ol manmeri hat bilong ol i save malolo wantaim Jisas ol i ken amamas tru! Na mi tu i laik malolo oltaim klostu long tabernakel long ai bilong yu, dia Jisas. Yu stap long tabernakel na yu wetim mi oltaim, olsem mi laik kam planti taim bilong kisim malolo klostu long yu.

O Bikpela bilong mi! Bipo mi no bin laikim yu tumas na planti taim mi bin lusim yu i stap wanpis long haus lotu. Na

mi sori long dispela les pasin bilong mi. Na mi tenkim yu long bikipela laik bilong yu, long wanem yu no bin lusim mi, tasol yu save wetim mi oltaim. Na olsem wanem yu bin wetim mi? Mi save pinis. Yu wetim mi bai bikipela laik bilong yu i kam long mi i kamap ples klia. Na tu bikos yu laik givim yu yet olgeta long mi. Na olsem nau, Jisas, mi no laik lusim yu i stap wanpis moa.

Long nau inap long las de bilong laip bilong mi, mi laik givim olgeta taim bilong mi long yu. Tasol yu mas helpim mi, long wanem, mi man bilong sin, na planti taim mi save promis nating na mi no save inapim gut ol promis bilong mi. Taim mi bin stap longwe long yu, yu bin wetim mi. Na maski mi bin givim baksait long yu, yu bin pulapim mi long bikipela marimari bilong yu. Nau mi kam klostu pinis, na olsem mi save bai yu pulapim mi moa yet long planti gutpela samting.

Mi laikim yu, Jisas, wantaim olgeta strong bilong mi. Mi laikim yu moa long olgeta samting, na moa long mi yet. Mi sori long ol sin bilong mi i bin givim bikipela pen long yu. Pogivim mi na givim grasia long mi, bai mi ken laikim yu tru inap oltaim oltaim na abrusim olgeta samting nogut.

O Jisas, yu God bilong mi! Soim bikipela pawa bilong yu na tanim bel bilong mi, bai mi ken pas tru wantaim yu. Tingim Pen na Indai bilong yu na helpim mi oltaim.

SOTPELA PREA LONG JISAS
MI TENKIM YU, JISAS,
BIKOS YU BIN WETIM MI INAP LONG TUDE.

Yumi i mas beten Spiritual Komunio i stap long pes 6

VISITIM SANTU MARIA

Santu German i tok olsem ol manmeri inap long go long heven long interesen bilong santu Maria, long wanem Maria em i meri bilong tilim ol grasia.

Mama, sapos yu no helpim mi, mi bai no inap long go long heven. Tasol mi bilip dispela tok ol santu i mekim, na em i olsem, yu no save lusim ol pikinini bilong yu husat i singaut long yu. Na olsem nau mi singaut long yu, bai yu ken marimari long ol sin bilong mi. Yu hop bilong mi.

SOTPELA PREA LONG SANTU MARIA MARIA, YU HOP BILONG MI.

Yumi i mas beten Prea long santu Maria i stap long pes 7

VISITIM SANTU JOSEP

Taim santu Maria i go visitim kandere bilong em Elisabet, Maria i givim «gude» long Elisabet na pikinini i stap long bel bilong Elisabet i kalap wantaim bikpela amamas, na Jisas i bin pulapim dispela pikinini wantaim olgeta grasia.

Dia santu Josep, yu bin stap planti yia wantaim Maria long haus bilong yu, na olsem mi save God i bin pulapim yu tu long olgeta grasia. Yu ken amamas tru, santu Josep, long wanem yu bin stap longpela taim tru wantaim santu Maria long haus bilong Nasaret, na yu bin harim olgeta tok santu Maria bin mekim. Helpim mi bai mi ken bihainim ol gutpela pasin Mama Maria na Jisas i bin mekim taim tupela i bin stap wantaim yu long haus bilong Nasaret.

SOTPELA PREA LONG SANTU JOSEP
SANTU JOSEP, GIVIM GRASIA LONG MI
BAI MI KEN BIHAINIM OL GUTPELA PASIN
BILONG SANTU MARIA.

Yumi i mas beten Prea long santu Josep i stap long pes 8

DE NAMBA 15

Pastaim yumi i mas beten Prea long Jisas i stap long pes 5

VISITIM JISAS

Wanpela saveman bilong Sios i tok olsem santu yukaris em i nambawan samting i save helpim yumi long laikim Jisas, na i no gat narapela samting long graun i ken winim sakramen bilong yukaris.

Na wanpela taim santu Katerin i prea i stap klostu long tabernakel na Jisas i kamap long em olsem wanpela paia i no save dai, na i luk olsem dispela paia i laik kukim olgeta hap bilong dispela graun. Na olsem dispela santu i luksave olsem laik bilong Jisas i stap long yukaris em i olsem dispela paia i no save dai na i laik kukim hat bilong olgeta manmeri bilong graun.

Jisas, kukim mi tu long bikpela laik bilong yu! Mekim mi i no tingting long narapela samting. Mekim mi i no laikim narapela samting. Mi laik tingting na laikim yu tasol. Na rausim tu olgeta samting nogut i stap yet long sol bilong mi.

O Jisas bilong mi! Long bikpela laik bilong yu i kam long mi, yu bin daunim yu yet tumas na yu stap long santu yukaris.

Mi tu i laik daunim mi yet na givim mi yet olgeta long yu. Yes, Jisas, yu Bikpela bilong mi, na tude mi laik givim olgeta samting bilong mi long yu.

God Papa! Tingim Pen na Indai bilong Jisas na kisim dispela liklik sakrifais bilong mi. Pen na Indai bilong Jisas i save kamap gen long taim bilong santu Misa. Na olsem tingim ol pen bilong Pikinini bilong yu Jisas na kisim mi.

Mi laik lusim laip bilong mi bilong givim amamas long yu, olsem ol martir i bin mekim. Tasol sapos mi no inap long mekim olsem, mi laik mekim planti sakrifais bilong soim laik bilong mi i go long yu. Mi laik bihainim laik bilong yu oltaim inap long las de bilong laip bilong mi.

SOTPELA PREA LONG JISAS
SANTU HAT BILONG JISAS,
KUKIM MI LONG BIKPELA LAIK BILONG YU!

Yumi i mas beten Spiritual Komunio i stap long pes 6

VISITIM SANTU MARIA

Dia Mama bilong mi! Santu Bernard i kolim yu «as bilong hop bilong mi». Na santu Jon Damasin i tok: «Long han bilong yu, Maria, mi putim olgeta hop bilong mi». Tude mi laik putim hop bilong mi long han bilong yu, bai yu ken askim Jisas long marimari long ol sin bilong mi, na bai yu ken helpim mi long stap gutpela kristen inap long las de bilong laip bilong mi. Salvesen i kam long han bilong yu, Maria, long wanem Jisas yet i bin putim olgeta grasia long han bilong yu, na yu save tilim ol. Helpim mi long sevim sol bilong mi!

SOTPELA PREA LONG SANTU MARIA
MARIA, YU SALVESEN BILONG OLGETA MANMERI
I SAVE SINGAUT LONG YU!
HELPIM MI TU LONG SEVIM SOL BILONG MI!

Yumi i mas beten Prea long santu Maria i stap long pes 7

VISITIM SANTU JOSEP

Taim santu Josep na Maria i wokabaut i go long taun Betlehem, Maria i karim pikinini Jisas na putim em long wanpela bokis kaikai bilong ol bulmakau, long wanem santu Josep em i tarangu na i no gat mani. Em i karim bikipela pen taim em i mas putim liklik Jisas long bokis kaikai bilong ol bulmakau. Nau mi laik tingting long bikipela pen santu Josep i bin karim long dispela nait holi, long wanem Jisas i liklik tumas na em i kol na hangre, tasol santu Josep i no inap long helpim em liklik.

O santu Josep, gutpela wasman bilong mi! Tingim dispela bikipela pen yu bin karim long nait bilong Krismas, na helpim mi long sori tru long ol sin mi bin mekim, long wanem ol sin bilong mi i bin givim bikipela pen long Jisas.

SOTPELA PREA LONG SANTU JOSEP
SANTU JOSEP, HELPIM MI
LONG BIHAINIM DAUNPASIN BILONG JISAS
NA LONG LUSTINGTING
LONG OL SAMTING BILONG DISPELA GRAUN.

Yumi i mas beten Prea long santu Josep i stap long pes 8

DE NAMBA 16

Pastaim yumi i mas beten Prea long Jisas i stap long pes 5

VISITIM JISAS

Em bai gutpela sapos olgeta manmeri i ken kam long yukaris bilong kisim marasin i ken oraitim ol long ol samting nogut! Sapos ol i mekim olsem, mi no ting planti samting nogut bai stap yet long ol. Profet Jeremaia i krai sori na em i tok: *Ating distrik Gileat i no gat gutpela marasin i stap moa long em, a? Na ol i no gat dokta tu, a? Olsem wanem na tarangu ol manmeri bilong mi i no kamap orait yet?* (Jeremaia 8:22). Dispela distrik Gileat profet i tok long em, em i wanpela ples long kantri Arabia i pulap long ol gutpela marasin. Na santu Beda i tok olsem dispela ples em i piksa bilong Jisas, long wanem Jisas i pulap long ol gutpela marasin i ken oraitim yumi.

Jisas, mi inap long harim yu i tokim mipela olsem: «Yu pikinini bilong Adam, yu no ken komplein long ol pen na long ol samting nogut bilong yu. Yu mas kam long sakramen bilong yukaris, na yu bai luksave olsem mi gutpela dokta i gat ol kain kain gutpela marasin bilong oraitim yu». Long Buk

bilang Gutnius Jisas i tok: *Yupela ol man i save hatwok tru na i karim ol bikpela bevi, yupela olgeta kam long mi na bai mi givim malolo long yupela* (Matyu 11:28).

Taim Jisas i go lukim pren bilang em Lazarus, tupela susa bilang Lazarus i tokim Jisas olsem: *Bikpela, dispela man yu laikim tumas, em i gat sik* (Jon 11:3). Bikpela, mi dispela sikman yu laikim em tumas. Sol bilang mi i pulap long planti sua long ol sin mi bin mekim. Na olsem tude mi kam long yu, long wanem yu gutpela dokta bilang mi, bai yu ken oraitim mi. Buk Baibel i tok olsem: *God, yu as bilang sori, yu ken marimari long mi. Yu gat bikpela marimari tru, olsem na mi laik yu rausim olgeta pasin nogut bilang mi. Yu wasim mi olgeta, na bai pasin nogut i no i stap moa long mi. Rausim sin bilang mi na mi ken kamap klin. Mi save mi mekim rong pinis. Mi no inap lusim tingting long sin bilang mi. Mi mekim sin long yu wanpela tasol. Mi mekim pasin nogut long ai bilang yu. Olsem na yu mekim stretpela pasin tasol na yu kotim mi na yu bekim sin bilang mi* (Sam 51).

Dia Jisas, helpim mi long save gut long bikpela laik bilang yu i kam long mi. Mi no laikim moa ol samting bilang dispela graun. Mi laikim yu tasol. Tasol han bilang mi i no gat wanpela gutpela samting bilang givim long yu. Na olsem mi laik givim yu wanem samting mi gat: famili bilang mi, na ol gutpela samting yu save givim long mi, mi laik givim bek long yu. Mi laik givim olgeta laik bilang mi long yu. Mi laikim yu tumas. Mi laikim yu moa long mi save laikim mi yet. Na mi laik mekim olsem inap oltaim oltaim.

SOTPELA PREA LONG JISAS
JISAS BILONG MI,
MI LAIK GIVIM MI YET OLGETA LONG YU!

Yumi i mas beten Spiritual Komunio i stap long pes 6

VISITIM SANTU MARIA

Mama Maria, wanpela de yu bin tokim santu Brigit olsem: «Sapos wanpela man o meri bilong mekim sin i sori tru long sin em i bin mekim na em i kam long mi, mi redi long kisim em. Mi no save lukluk long ol planti sin em i bin mekim. Mi lukluk tasol long sori bilong dispela man o meri tasol. Na mi no save les long klinim na oraitim ol sua i stap long sol bilong em, long wanem mi Mama bilong marimari». Na olsem, Mama bilong mi, nau mi kam long yu bai yu ken oraitim mi.

SOTPELA PREA LONG SANTU MARIA
O MARIA, MARIMARI LONG MI!

Yumi i mas beten Prea long santu Maria i stap long pes 7

VISITIM SANTU JOSEP

Nau mi tingting long bikpela laik na amamas bilong santu Josep taim em i lukim pikinini Jisas i slip long bokis kaikai bilong ol bulmakau. Taim em i lukim Jisas i slip, em i harim tu ol ensel i wok long singsing amamas klostu long pikinini Jisas.

Dia wasman bilong mi, santu Josep, tingim dispela bikpela amamas bilong yu na helpim mi, bai mi tu i ken laikim Jisas olsem yu bin laikim em, na bai wanpela de mi ken go long paradais wantaim em.

SOTPELA PREA LONG SANTU JOSEP
HELPIM MI, SANTU JOSEP, LONG LAIKIM JISAS
NA SANTU MARIA OLTAIM.

Yumi i mas beten Prea long santu Josep i stap long pes 8

DE NAMBA 17

Pastaim yumi i mas beten Prea long Jisas i stap long pes 5

VISITIM JISAS

Man i save laikim tumas pren bilong em, i amamas stret long stap wantaim dispela pren. Na olsem sapos yumi i laikim Jisas, yumi i sapos long amamas long stap wantaim em long haus lotu. Jisas i stap long yukaris na em i inap long lukim yumi na harim ol singaut bilong yumi. Na yumi i mas toktok na stori wantaim em.

Yumi i mas kam na painim malolo klostu long em. Yumi i mas amamas long bikpela bilas bilong em na long bikpela laik bilong planti gutpela manmeri i amamas long i go long em. Na olsem yumi tu i mas givim yumi olgeta long Jisas, bai em i ken kamap masta bilong yumi.

I gat stori bilong wanpela pater i save visitim Jisas planti taim stret long haus lotu. Olgeta taim em i wokabaut nabaut klostu long haus lotu, em bai i go insait, nildaun long ai bilong Jisas na beten liklik taim long em. Tasol em i mekim olsem planti taim long olgeta de, na olsem taim em i stap

wantaim Jisas i bikpela taim tumas. Na Jisas i bin givim bikpela presen long em, long wanem dispela pater i bin dai olsem martir bikos em i no laik lusim bilip bilong em long santu yukaris. Ol haiden i bin askim em long tok olsem yukaris em i bret nating, na dispela pater i sanap strong long bilip bilong em, na em i tokaut klia olsem yukaris em i bodi bilong Krai, na olsem ol i kilim em i dai. Na pe dispela pater i kisim long heven i bikpela tru.

Jisas, mi tu bai amamas sapos yu givim sans long mi long kamap martir long bilip bilong mi olsem dispela pater. Long wanem dispela sakramen i soim laik bilong yu i kam long mipela, na mi oltaim i laik tokaut klia olsem yu stap long yukaris. Yu save mekim planti mirakel, Jisas, na olsem mi askim yu long tanim bel bilong mi, bai mi ken kamap bilong yu tasol.

Yu no laik bai mi laikim ol samting bilong graun. Nogat. Yu laik bai mi kamap bilong yu tasol. Na olsem helpim mi, bai mi ken inapim dispela samting yu askim long mi.

SOTPELA PREA LONG JISAS **JISAS BILONG MI, MI LAIK LAIKIM YU TRU.**

Yumi i mas beten Spiritual Komunio i stap long pes 6

VISITIM SANTU MARIA

Maria, yu Kwin bilong mi! Na mi amamas long kolim yu «Mama, yu gut olgeta». Long wanem yu tasol, santu Maria, yu gut olgeta. Buk Baibel i gat tok olsem: «...*king bai i lukim yu i naispela meri na em bai i laikim yu tru*» (Sam 45:12). Yu dispela naispela meri, na God Papa i bin lukim yu na laikim yu tru,

na em i makim yu olsem mama tru bilong Pikinini bilong em. Santu Bonaventura i tok: «Planti manmeri taim ol i harim nem bilong Maria, ol i save amamas tumas na laik bilong ol i go long yu i save kamap bikipela moa moa yet». Yu gutpela! Yu naispela, Virgo Maria!

Na olsem mi tu i mas laikim yu. Na mi laik winim olgeta manmeri long bikipela laik bilong mi i go long yu. Na olsem mi askim yu long harim dispela singaut bilong mi. Na God Papa tu bai amamas long lukim dispela bikipela laik bilong mi i go long yu.

**SOTPELA PREA LONG SANTU MARIA
MAMA BILONG MI, YU GUT OLGETA!
MI LAIKIM YU TUMAS!**

Yumi i mas beten Prea long santu Maria i stap long pes 7

VISITIM SANTU JOSEP

Taim Jisas i kamap man, King Herot i bin salim ol soldia bilong em bilong kilim i dai olgeta pikinini i stap long kantri, long wanem em i laik kilim pikinini Jisas. Tasol God Papa i bin helpim pikinini Jisas, na olsem em i salim wanpela ensel long toksave long santu Josep olsem em i mas kisim pikinini Jisas na Mama Maria na ol i mas ranawe na i stap hait long kantri Isip. Na wantu tasol santu Josep i kisim meri bilong em Maria na pikinini Jisas na kisim ol i go long dispela longwe kantri.

Gutpela wasman bilong mi, santu Josep! Wantu tasol yu bin harim tok bilong God na yu bin bihainim laik bilong em.

Helpim mi long bihainim laik bilong God wankain olsem yu yet yu bin bihainim. Na mekim santu Maria na Jisas i stap wantaim mi oltaim, wankain olsem tupela i bin stap planti yia wantaim yu.

SOTPELA PREA LONG SANTU JOSEP
MAN O MERI I HARIM TOK BILONG GOD,
EM I KEN AMAMAS!

Yumi i mas beten Prea long santu Josep i stap long pes 8

DE NAMBA 18

Pastaim yumi i mas beten Prea long Jisas i stap long pes 5

VISITIM JISAS

Long las de Jisas bai kam bek wantaim bikpela bilas bilong em bilong mekim kot long olgeta manmeri. Tasol nau em i save stap namel long yumi long sakramen bilong yukaris, na em i no save kotim yumi. Nogat. Long yukaris Jisas i save laikim yumi tasol.

Sapos wanpela king bilong dispela graun i lusim haus king bilong em na i sanapim wanpela liklik haus bilong em namel long ol haus bilong ol manmeri nating, ol dispela lain manmeri i sapos long visitim dispela king na givim ona na tok tenkyu long em. Wankain olsem tasol Jisas i bin mekim long yumi. Em i bin putim haus bilong em namel long ol haus bilong yumi, long wanem Jisas i stap long olgeta tabernakel bilong dispela graun. Na olsem yumi i sapos long visitim em na tok tenkyu long em.

Jisas, ol ensel long heven i save stap oltaim wantaim yu na amamas long ai bilong yu. Olsem tasol mi laik stap oltaim

wantaim yu. Long Buk Baibel i gat tok olsem: *Bikpela, bai mi tenkyu long yu namel long ol arapela lain. Bai mi go long olgeta manmeri na litimapim nem bilong yu* (Sam 108:3). Dia Jisas, mi laik inapim dispela tok na litimapim nem bilong yu namel long ol manmeri.

O God bilong mi, yu stap long santu sakramen bilong alta! Yu bret bilong ol ensel! Yu bret bilong laip! Mi laikim yu. Tasol laik bilong mi i go long yu i liklik tumas. Mekim laik bilong mi i go long yu i kamap bikpela moa yet!

Mi laik lustingting long olgeta samting bilong dispela graun. Mi laik tingting long yu tasol, na laikim yu moa long olgeta samting. Mi laik litimapim nem bilong yu tasol.

Mi laikim yu wantaim olgeta strong bilong mi. Tasol mi laik laikim yu moa moa yet!

SOTPELA PREA LONG JISAS
JISAS BILONG MI,
MEKIM LAIK BILONG MI I GO LONG YU
I KAMAP BIKPELA MOA MOA YET!

Yumi i mas beten Spiritual Komunio i stap long pes 6

VISITIM SANTU MARIA

Planti sikmanmeri i save stap wanpis na i no gat wanpela gutpela man o meri i save lukautim ol. Na planti manmeri bilong sin tu i save stap olsem pikinini i no gat papamama, na i no gat wanpela man o meri i save helpim ol long tanim bel. Tasol santu Efren i save kolim Maria «ples hait bilong ol manmeri bilong sin». Long wanem, Maria i no save lustingting long ol, na maski ol i mekim sin, Maria i save sambai long ol.

Na olsem, Kwin bilong mi, nau mi kam long yu olsem ol dispela lain manmeri bilong mekim sin i no gat papamama, na mi save olsem yu bai kisim mi olsem pikinini tru bilong yu. Yu no inap long lusim mi i stap wanpis. Nogat. Yu save sambai long mi. Na olsem nau mi ran i kam long yu. Yu ples hait bilong mi na yu hop bilong mi tu. Sapos yu lusim mi, bai mi go we? Tasol mi save pinis, yu no lusim mi.

SOTPELA PREA LONG SANTU MARIA
MARIA, YU PLES HAIT BILONG MI,
HELPIM MI LONG SEVIM SOL BILONG MI!

Yumi i mas beten Prea long santu Maria i stap long pes 7

VISITIM SANTU JOSEP

Taim santu Josep i kisim meri bilong em Maria na pikinini Jisas i go long Isip, em i bin karim bikpela pen! Na tu em i pret nogut tru, long wanem em i save olsem King Herot i laik kilim pikinini Jisas i dai.

O santu Josep, yu waspapa bilong Jisas! Tingim gen ol dispela pen bilong yu, na strongim mi long karim ol pen bilong mi wantaim bel isi na amamas.

SOTPELA PREA LONG SANTU JOSEP
O SANTU JOSEP! GIVIM BEL ISI LONG MI
LONG TAIM BILONG KARIM PEN!

Yumi i mas beten Prea long santu Josep i stap long pes 8

DE NAMBA 19

Pastaim yumi i mas beten Prea long Jisas i stap long pes 5

VISITIM JISAS

Taim yumi i stap wantaim ol pren bilong yumi, yumi i save amamas tru. Tasol Jisas em i nambawan pren bilong yumi, na olsem amamas bilong yumi i mas bikpela tru! Laik bilong Jisas i go long yumi i winim tru laik bilong ol pren bilong dispela graun.

Jisas i stap long santu sakramen na yumi inap long toktok wantaim em. Yumi i ken opim hat bilong yumi na putim long han bilong em olgeta wari bilong yumi. Jisas em i King bilong heven, na yumi i ken toktok wantaim em wantaim bikpela konfidens tru.

Buk Baibel i tok olsem taim Josep, pikinini bilong Jekop, i bin stap long kalabus, God yet i bin kam insait long kalabus bilong givim amamas na bel isi long em (Gutpela na stretpela tingting 10:13-14). Tasol long yukaris Jisas i save winim tru dispela pasin bipo God Papa i bin mekim long Josep. Long wanem Jisas em i God tru na em i save

stap oltaim long tabernakel, bilong givim amamas na bel isi long yumi olgeta de.

Taim wanpela man i stap long kalabus, em i save amamas long ol pren i save kam na visitim em. Olsem tasol Jisas i stap long dispela sakramen olsem wanpela kalabusman na em i no inap long lusim tabernakel. Na em i tokim mipela wankain olsem em i bin tokim long ol disaipel bilong em: *Harim. Mi save stap wantaim yupela olgeta de, i go inap long dispela taim i pinis* (Matyu 28:20). Jisas i tokim yumi tu olsem: «Mi stap wantaim yupela. Mi bin lusim haus bilong mi long heven na mi kam long dispela tabernakel bai yupela i ken painim amamas na bel isi klostu long mi».

Jisas, givim amamas na bel isi long mi! Marimari long ol sin bilong mi, na bihain kisim mi i go long heven wantaim yu, bai mi ken laikim yu inap oltaim oltaim.

Laikim pasin bilong yu, Jisas, em i olsem solwara i no save pinis! Na olgeta de yu save stap long alta, na yu save wetim mi. Na olsem mi no laik lusim yu i stap wanpis long haus lotu. Mi laik stap wantaim yu olgeta de.

Sapos bipo mi bin stap longwe long yu, nau mi laik senisim laip bilong mi na adorim yu oltaim. Mi sori long pasin les bilong mi bilong bipo, na nau mi amamas bikos mi gat taim bilong adorim yu na stap wantaim yu.

Jisas, yu laik bilong mi, yu olgeta gutpela samting bilong mi! Mi laikim yu tumas!

SOTPELA PREA LONG JISAS
GOD BILONG MI, HELPIM MI LONG LAIKIM YU!

Yumi i mas beten Spiritual Komunio i stap long pes 6

VISITIM SANTU MARIA

Wanpela santu i tok: «Sapos yu man bilong sin, yu no ken pret tumas na no ken lusim hop bilong yu. Yu mas kam long Maria na wantu tasol em bai helpim yu. Yu bai painim Maria i pulap long marimari na long olgeta grasia. Na Maria bai amamas stret long helpim yu».

Maria, mi laik tenkim God nau long wanem em i mekim mi i kisim save long yu na laikim yu. Sapos mi no save long yu, mi tarangu olgeta na mi olsem wanpela rabisman. Tasol mi save long yu pinis, na olsem mi putim hat bilong mi na olgeta hop bilong mi long han bilong yu.

SOTPELA PREA LONG MARIA

O MARIA! MAN I TRASTIM YU I KEN AMAMAS!

Yumi i mas beten Prea long santu Maria i stap long pes 7

VISITIM SANTU JOSEP

Long Buk bilong Gutnius Jisas i tok: *Man i ting: «Mi laik helpim disaipel bilong Jisas, na em i givim kap kol wara tasol long wanpela bilong ol dispela manmeri nating i stap long lain disaipel bilong mi, orait mi tok tru long yupela, pe bilong dispela man bai i no inap lus»* (Matyu 10:42). Santu Josep i ken tokim Jisas olsem: «Jisas, mi waspapa bilong yu! Mi no bin givim kol wara tasol long yu. Mi bin lukautim yu planti yia na mi bin helpim yu long olgeta samting yu bin sot long em. Na tu mi bin sevim laip bilong yu taim King Herot i laik kilim yu

i dai». Na olsem nau mipela i ken tingting long bikpela pe santu Josep i bin kisim long heven.

O wasman bilong mi, santu Josep! Tingim olgeta wok yu bin mekim bilong helpim Jisas taim em i liklik pikinini, na helpim mi long trastim Providens bilong God oltaim na go long heven.

SOTPELA PREA LONG SANTU JOSEP
O DIA SANTU JOSEP!
HELPIM MI LONG LAIKIM JISAS OLTAIM!

Yumi i mas beten Prea long santu Josep i stap long pes 8

DE NAMBA 20

Pastaim yumi i mas beten Prea long Jisas i stap long pes 5

VISITIM JISAS

Long Buk bilong profet Zekaraia i gat tok profet olsem: «Dispela taim bai i kamap na bai mi putim wanpela hul wara i stap. Ol lain tumbuna bilong Devit na ol manmeri bilong Jerusalem i bin lotu long ol giaman god na mekim planti sin. Olsem na dispela wara bai i rausim olgeta sin bilong ol» (13:1). Jisas i stap long santu sakramen em i dispela hul wara i save rausim ol sin bilong yumi. Na dispela wara i no save pinis, na olsem mipela i ken kam olgeta de bilong kisim pogivim bilong Jisas. Na olsem taim wanpela man o meri i mekim sin, em i mas kam klostu long santu sakramen bilong yukaris, long wanem dispela sakramen em i olsem marasin i save oraitim yumi.

Yes, Jisas, bai mi mekim olsem tasol oltaim. Mi save olsem dispela sakramen i save rausim ol sin bilong mi, na i save givim lait na strong long mi, bai mi no ken pundaun gen long sin.

Mi save olsem yu wetim mi oltaim na yu save givim planti grasia long mi taim mi kam long visitim yu. O Jisas bilong mi!

Tekewe olgeta sin mi bin mekim. Mi sori tru long ol sin bilong mi! Na strongim mi, bai mi ken abrusim ol pasin nogut na bai mi ken laikim yu moa long olgeta samting.

Santu Teresa i stori long wanpela sista husat i bin kisim tok orait bilong bisop bilong em, na dispela sista i bin putim wanpela liklik haus bilong em insait long haus lotu, long wanem em i laik stap oltaim klostu long Jisas.

Na narapela santu i save tok olsem i no gutpela long mipela i wokabaut klostu long haus lotu na mipela i no go insait na beten liklik long Jisas. Dispela santu i tok olsem taim yumi i wokabaut klostu long haus bilong ol pren bilong yumi, yumi i save givim «gude» long ol. Olsem tasol taim yumi i wokabaut klostu long haus lotu yumi tu i sapos long kam insait na givim «gude» long Jisas.

Jisas, laikim pasin bilong yu i no save pinis! Yu stap long haus lotu na planti taim mi no save kam long visitim yu. Nau mi laik senis dispela pasin les bilong mi, na mi laik givim taim bilong mi long yu.

Yu God tru na mi olsem wanpela binatang, na yu bin givim laip bilong yu bilong helpim mi. Nau mi laik givim laip bilong mi bilong givim amamas long yu.

Helpim mi, Jisas, long laikim yu moa yet na long bihainim laik bilong yu oltaim.

SOTPELA PREA LONG JISAS
JISAS, MI LAIKIM YU
NA YU LAIKIM MI.

Yumi i mas beten Spiritual Komunio i stap long pes 6

VISITIM SANTU MARIA

Maria, yu gutpela Kwin bilong mi! Santu Bernard i tok olsem yu no save skelim ol sin bilong ol manmeri, tasol yu save marimari long ol na helpim ol oltaim. Na olsem mi save yu bai harim ol singaut bilong mi.

Harim mi nau, Mama. Mi man bilong mekim sin, na ol sin bilong mi i bin opim dua bilong hel long mi. Tasol mi laik tanim bel nau na senisim laip bilong mi. Mi save pinis olsem mi bin givim bikpela pen long God long ol sin bilong mi. Na olsem nau mi kam long yu bai yu ken kisim mi olsem pikinini bilong yu.

SOTPELA PREA LONG SANTU MARIA

O MARIA, MI BILONG YU!

HELPI MI LONG SEVIM SOL BILONG MI!

Yumi i mas beten Prea long santu Maria i stap long pes 7

VISITIM SANTU JOSEP

Taim santu Josep i harim olsem Maria i bin kisim bel long Holi Spirit, em i tingting planti na em i laik lusim Maria, long wanem, em i tingting em i no gutpela man tumas inap long lukautim Maria na Jisas. Tasol wanpela ensel i kamap long em na tokim santu Josep olsem em i no ken pret na em i mas was long Jisas na Maria oltaim.

O wasman bilong mi, santu Josep! Kisim mi tu olsem pikinini bilong yu! Mi laik bai yu sambai long mi olsem yu bin sambai long meri bilong yu Maria na long pikinini Jisas. Taim

pikinini Jisas i stap wantaim yu, em i no save pret long wanpela samting, long wanem em i save olsem yu stap na yu save lukautim em. Na olsem mi kam long yu bai yu ken sambai long mi tu oltaim.

SOTPELA PREA LONG SANTU JOSEP
GUTPELA WASMAN BILONG MI,
SAMBAI LONG MI OLTAIM!

Yumi i mas beten Prea long santu Josep i stap long pes 8

DE NAMBA 21

Pastaim yumi i mas beten Prea long Jisas i stap long pes 5

VISITIM JISAS

Long Buk bilong Gutnius Jisas i tok olsem: *Long ples bodi bilong ol man i dai pinis i slip i stap long em, long dispela ples tasol ol tarangau i save kam bung* (Matyu 24:28). Ol tarangau i piksa bilong ol gutpela manmeri, na dispela bodi Jisas i tok long em, em i bodi bilong em yet. Na olsem long ples bodi bilong Jisas i stap long em, planti gutpela manmeri i save kam bilong adorim em na kisim amamas klostu long em.

Santu Jerom i tok olsem ol tarangau i save skelim ol kaikai i stap longwe, na wantu tasol ol i save kam hariap na kisim dispela kaikai. Olsem tasol yumi tu i mas kam hariap long haus lotu na visitim Jisas olsem wanpela man i dai long wara i save go hariap long raunwara bilong dring.

Wanpela gutpela pater, nem bilong em Baltasar, maski em i wok i stap, oltaim ai bilong em bai lukluk i go long ples haus lotu i stap long em, bilong soim Jisas olsem em i no save lustingting long em. Na dispela pater i save krai sori taim em

i lukim ol planti manmeri i bung wantaim bilong welkamin wanpela bikman, tasol ol i lusim Jisas i stap wanpis long tabernakel. Tabernakel em i haus bilong Jisas, na Jisas em i King bilong heven na graun.

Na nau, Bikpela bilong mi, mi harim olsem yu save singautim mi long kam long yu na adorim yu long santu yukaris. Maski mi gat planti sin tumas, mi laik kam na lukim yu. Helpim mi long tanim bel, na mekim mi i givim amamas long yu tasol.

Mi laikim yu wantaim olgeta strong bilong mi! Helpim mi long abrusim ol samting nogut, na mekim mi i pas tru wantaim yu inap oltaim.

SOTPELA PREA LONG JISAS
JISAS BILONG MI,
HELPIM MI LONG PAS TRU
WANTAIM YU INAP OLTAIM!

Yumi i mas beten Spiritual Komunio i stap long pes 6

VISITIM SANTU MARIA

Ol santu i kolim Maria «meri bilong helpim ol manmeri bilong sin». O Mama bilong God! Yu save helpim ol manmeri bilong sin, na olsem tude mi kam long yu bai yu ken helpim mi tu, long wanem mi man bilong mekim planti sin tumas. Yu mas inapim dispela wok Jisas yet i bin givim long yu, em i wok bilong helpim mipela ol manmeri i singaut long yu.

Em i tru, mi bin mekim planti sin tumas, tasol nau yu inap long helpim mi. Na sapos yu prea bilong helpim mi, mi save

olsem Jisas bai pogivim ol sin bilong mi na mi bai inap long sevim sol bilong mi.

SOTPELA PREA LONG SANTU MARIA
GUTPELA MAMA BILONG MI,
YU MAS HELPIM MI LONG SEVIM SOL BILONG MI!

Yumi i mas beten Prea long santu Maria i stap long pes 7

VISITIM SANTU JOSEP

Maria tupela Josep i save pinis long olgeta tok ol profet i bin mekim, olsem Jisas i mas karim pen na dai long diwai kros. Na Maria tupela Josep i tingting planti long dispela.

O gutpela waspapa bilong Jisas! Tingim dispela bikpela pen bilong yu taim yu tingting long indai bilong Jisas, na helpim mi long tingim oltaim Pen na Indai bilong Jisas, bai mi ken laikim em moa moa yet. Jisas em i Ridima bilong mi na mi bin givim planti pen long em. Helpim mi nau, santu Josep, bai mi ken tingim oltaim Pen na Indai bilong Jisas na abrusim ol sin.

SOTPELA PREA LONG SANTU JOSEP
SANTU JOSEP, YU WASMAN BILONG MI,
HELPIM MI LONG TINGIM OLTAIM
PEN NA INDAI BILONG JISAS,
NA DISPELA TINGTING I KEN GIVIM STRONG
NA BEL ISI LONG MI.

Yumi i mas beten Prea long santu Josep i stap long pes 8

DE NAMBA 22

Pastaim yumi i mas beten Prea long Jisas i stap long pes 5

VISITIM JISAS

Long Buk Baibel i gat stori bilong wanpela meri i save laikim tumas man bilong em, na taim dispela meri i no lukim man bilong em, em i save tok: *Ol wasman bilong taun i lukim mi. Na mi askim ol: «Yupela i lukim pren bilong mi, mi save laikim em tumas, o nogat?»*. *Mi lusim ol na mi go na wantu mi lukim pren bilong mi. Mi go long em na mi holimpas em na mi no laik em i lusim mi* (Song bilong Solomon 3:3-4). Pastaim Jisas i no bin stap long dispela graun. Tasol nau em i stap. Na olsem sapos wanpela man o meri i laik painim Jisas, ol i ken painim em long santu sakramen.

Santu Jon bilong Avila i tok olsem long ai bilong em olgeta haus lotu i wankain na i no gat wanpela haus lotu i winim narapela, long wanem Jisas i stap long ol.

O God bilong mi, laikim pasin bilong yu i no save pinis! Olsem wanem na yu bin putim haus bilong yu namel long ol manmeri, na yu hait long wanpela liklik hap bret? O Tok

bilang God! Yu laikim mipela tumas, na olsem yu daunim yu yet tumas bilong stap oltaim wantaim mipela oltaim long santu sakramen. Na olsem mi mas laikim yu wantaim olgeta strong bilong mi! Mi laikim yu tumas, na laik bilong mi i go long yu i winim olgeta samting. Mi amamas long yu tasol. Jisas, yu God bilong mi, yu lewa bilong mi na yu olgeta gutpela samting bilong mi! Kirapim paia bilong yu insait long hat bilong mi, bai mi ken amamas long stap oltaim klostu long yu long santu sakramen. Yu save singautim mi oltaim bai mi ken kam na visitim yu, na sapos mi no kam, mi man nogut pinis. O Bikpela bilong mi! Helpim mi long lustingting long olgeta samting bilong dispela graun.

Jisas, yu laik stap nambawan samting long laip bilong mi. Mi laikim yu tumas. Na mi no laik bihainim laik bilong mi. Nogat. Mi laik bihainim laik bilong yu tasol na givim amamas oltaim long yu. Kisim mi nau, Jisas bilong mi, long wanem maski mi man bilong sin, mi laikim yu tru. Helpim mi long grasia bilong yu, bai mi ken kamap wokboi nating bilong yu.

SOTPELA PREA LONG JISAS
MI LAIKIM YU, JISAS BILONG MI,
MOA LONG OLGETA SAMTING.

Yumi i mas beten Spiritual Komunio i stap long pes 6

VISITIM SANTU MARIA

Santu Maria, yu gutpela Mama bilong mi! Planti taim mi bin sakim tok bilong pikinini bilong yu, tasol nau mi sori na mi kam bilong askim marimari bilong yu. No ken les long mi,

gutpela Mama. Santu Bernard i save kolim yu «Meri i save tilim marimari bilong God». Na santu Efren i kolim yu «Meri i save helpim ol manmeri i lus pinis».

Na olsem, Mama bilong mi, lukim ol sin bilong mi na helpim mi. Planti taim mi sapos long go long hel, tasol God i bin pogivim mi. Na mi pret, nogut mi pundaun gen long sin. Na olsem mi trastim yu, long wanem yu inap long helpim mi. Yu inap long askim Jisas long marimari long mi na long kisim mi i go long heven. Na taim mi kam kamap long heven, bai mi litimapim nem bilong yu oltaim oltaim.

SOTPELA PREA LONG SANTU MARIA
BAI MI TOKAUT OLTAIM
LONG BIKPELA MARIMARI BILONG SANTU MARIA,
NA BAI MI LITIMAPIM EM OLTAIM OLTAIM.

Yumi i mas beten Prea long santu Maria i stap long pes 7

VISITIM SANTU JOSEP

Long Buk bilong Gutnius yumi i ridim stori bilong dispela tupela disaipel i wokabaut i go long taun Emeus, na tupela i no luksave olsem Jisas i wokabaut wantaim tupela. Na bihain taim ol i luksave pinis olsem Jisas i bin stap wantaim tupela, tupela i toktok namel long tupela yet olsem: «*Tru tumas, taim mitupela i wokabaut long rot, na em i givim toktok long mitupela, na em i autim as tingting bilong buk bilong God long mitupela, bel bilong mitupela i bin kirap tru*» (Luk 24:32). Nau yumi i mas tingting long santu Josep, long wanem em i bin stap 30-pela yia wantaim Jisas long haus na em i bin harim olgeta toktok Jisas i bin mekim. Na planti taim santu Josep i bin holimpasim

pikinini Jisas olsem ol papa i save mekim wantaim ol pikinini bilong ol, na pikinini Jisas i bin holimpasin santu Josep wankain olsem ol pikinini i save mekim long papa bilong ol.

Santu Josep! Tingim ol dispela naispela samting yu bin mekim na helpim mi long laikim Jisas moa moa yet, bai mi no ken putim hat bilong mi long ol samting bilong dispela graun, na bai mi ken pas long Jisas tasol.

**SOTPELA PREA LONG SANTU JOSEP
DIA SANTU JOSEP,
STRONGIM MI LONG LAIKIM JISAS OLTAIM!**

Yumi i mas beten Prea long santu Josep i stap long pes 8

DE NAMBA 23

Pastaim yumi i mas beten Prea long Jisas i stap long pes 5

VISITIM JISAS

Planti manmeri i save mekim kain kain sakrifais na yusim planti mani long go visitim Jerusalen na ol ples Jisas i bin stap long em. Tasol yumi i mas tingim oltaim olsem Jisas i stap klostu long yumi! Em i no stap long wanpela longwe ples. Nogat. Em i stap klostu long haus bilong yumi yet. Na olsem yumi i mas ran i go wantaim bikpela amamas long visitim Jisas i stap long santu sakramen.

Wanpela gutpela man i bin laikim Jisas tumas, em i bin raitim wanpela pas long ol pren bilong em na tokim ol olsem: «Mi save pinis olsem olgeta gutpela samting i save kam long yukaris tasol, na long dispela as tasol mi bin givim mi yet long Jisas i stap long yukaris. Long yukaris Jisas i redi long givim planti grasia long yumi, tasol sapos yumi i no go visitim em, em i no inap givim ol dispela grasia long yumi. Yukaris em i bikpela samting tumas! I no gat wanpela samting i ken winim dispela sakramen. Long yukaris yumi i ken luksave long bikpela laik bilong Jisas i kam

long yumi. Na olsem yumi i no ken jeles long ol manmeri i stap long heven, long wanem yumi tu i ken stap klostu long Jisas taim yumi i stap yet long dispela graun. Jisas i stap long yukaris, na olsem mi no save tingting na toktok long narapela samting. Nogat tru. Mi tingting na toktok long Jisas tasol».

Ol ensel na ol serafim, yupela i save stap klostu long Jisas oltaim na laik bilong yupela i go long em i bikpela tru! Tasol mi save pinis tu olsem laik bilong Jisas i kam long mi i bikpela tumas, na long dispela as em i bin haitim em yet long yukaris. Yupela ol ensel, yupela i mas helpim mi long laikim Jisas olsem yupela yet i save laikim em!

Na yu, Jisas, mekim laik bilong yu i go long ol manmeri i kamap ples klia, bai olgeta manmeri i ken laikim yu tru! Mi laik stap wantaim yu tasol inap oltaim.

SOTPELA PREA LONG JISAS
JISAS BILONG MI, MI BILIP LONG YU,
MI HOP LONG YU, MI LAIKIM YU,
MI GIVIM MI YET LONG YU.

Yumi i mas beten Spiritual Komunio i stap long pes 6

VISITIM SANTU MARIA

Gutpela Virgo, santu Bernard i kolim yu «Mama bilong ol pikinini i no gat papamama». Na santu Efren i kolim yu «Ples hait bilong ol pikinini i no gat papamama». Ol dispela lain i no gat papamama em ol manmeri bilong sin, long wanem ol i bin lusim Papa God pinis.

Na olsem nau mi kam long yu, gutpela Mama, long wanem mi tu i bin lusim Papa God long ol sin bilong mi. Tasol yu

Mama bilong mi, na olsem yu bai helpim mi long painim Papa bilong mi gen.

Pop Inosen namba 3 i tok olsem: «I no gat wampela man o meri long dispela graun i bin singautim santu Maria, na Maria i bin les long harim pre bilong dispela man o meri». Na olsem nau mi kam long yu, bai yu ken harim ol singaut bilong mi. Helpim mi long kolim nem bilong yu oltaim na trastim yu.

SOTPELA PREA LONG SANTU MARIA
SANTU MARIA, YU GUTPELA MAMA BILONG MI,
HELPI MI LONG TRASTIM YU OLTAIM.

Yumi i mas beten Prea long santu Maria i stap long pes 7

VISITIM SANTU JOSEP

Laip bilong santu Josep wantaim Mama Maria na Pikinini Jisas i bin pulap long laikim pasin na long ol gutpela pasin. Na olsem santu Josep i winim olgeta narapela santu i stap long heven. Mama Maria tasol i winim em.

Gutpela wasman bilong mi! Helpim mi bai mi ken pas oltaim wantaim God na abrusim ol giaman tok bilong Satan. Mi laik stap laip na indai wantaim Jisas na santu Maria.

SOTPELA PREA LONG SANTU JOSEP
JISAS, JOSEP NA MARIA,
SOL BILONG MI I KEN MALOLO
WANTAIM YUPELA OLTAIM.

Yumi i mas beten Prea long santu Josep i stap long pes 8

DE NAMBA 24

Pastaim yumi i mas beten Prea long Jisas i stap long pes 5

VISITIM JISAS

Long Buk bilong profet Aisaia i gat tok olsem: «*Yu, God bilong Israel, yu God bilong kisim bek ol manmeri bilong yu, yu save haitim yu yet long ol arapela manmeri*» (45:15). Na long santu yukaris dispela tok bilong profet Aisaia i kamap ples klia, long wanem God i save haitim em yet.

Taim God i kamap man, em i haitim God pasin bilong em, tasol ol manmeri inap lukim bodi bilong em. Tasol taim God i haitim em yet long yukaris, em i save hait olgeta na yumi i no inap lukim wanpela samting. Na santu Bernard i tok: «Bilong soim bikipela laik bilong em i kam long yumi, long yukaris Jisas i save haitim em yet olgeta. Yumi i no inap lukim God pasin bilong em na yumi i no inap lukim bodi bilong em tu. Tasol yumi i ken luksave long bikipela laik bilong em i kam long yumi, long wanem maski ai bilong yumi i no inap lukim wanpela samting, bilip bilong yumi i tok olsem Jisas i stap tru wantaim yumi».

God bilong mi! Yu save daunim yu yet tumas na yu save haitim yu yet long yukaris. Na long dispela daunpasin bilong yu, mi luksave long bikpela laik bilong yu i kam long mipela. Tasol planti manmeri i no luksave long ol dispela samting, na ol i no save mekim gut long yu. O Jisas! Planti manmeri i no save tingting long yu, na yu stap wanpis long ol haus lotu. Na planti manmeri tu i save mekim kain kain sin na givim bikpela pen long yu. Sampela lain i save pilai wantaim holi yukaris na tingting olsem dispela sakramen em i bret nating.

Taim mi tingting long dispela samting ai wara i save pundaun long ai bilong mi, na mi promis olsem bai mi visitim yu planti taim long haus lotu, bai yu no ken i stap wanpis. Na maski planti manmeri i les long visitim yu, mi laik kam visitim yu bilong kisim ples bilong ol dispela manmeri bilong les na givim amamas long yu.

Kisim mi, O God Papa, na kisim tu dispela liklik presen mi laik givim long Jisas, bilong givim amamas long em. Tingim Pikinini bilong yu na helpim mi long adorim em wantaim olgeta strong bilong mi. Mi laik bai ol manmeri i ken save long bikpela laik bilong Jisas i go long ol!

SOTPELA PREA LONG JISAS
O GUTPELA JISAS! MEKIM OL MANMERI
I SAVE LONG YU NA ADORIM YU.

Yumi i mas beten Spiritual Komunio i stap long pes 6

VISITIM SANTU MARIA

Mama bilong mi, strong bilong yu i bikpela tru! Taim mi pret long salvesen bilong mi, mi save painim hop long yu na

yu save strongim mi. Yu Mama bilong mi, na yu pulap long olgeta grasia. Santu Bonaventura i kolim yu «raunwara bilong olgeta grasia we ol manmeri i ken kam na kisim». Na santu Bernard i kolim yu «meri i pulap long grasia». Na dispela santu i tok tu olsem yu no amamas taim wanpela man o meri i sot long sampela samting na ol i no save askim yu, long wanem yu redi long helpim ol oltaim.

Yu gutpela Kwin bilong mi! Yu pulap long olgeta gutpela samting! Yu save pinis long wanem samting mi sot long em, na laik bilong yu i kam long mi i winim laik bilong mi i go long yu. Tude mi laik askim dispela samting long yu: givim wanem grasia yu save mi sot long em. Yu yet mas skelim, na givim long mi. Mi no inap long tok wanem grasia mi sot long em. Nogat. Yu yet mas skelim na givim dispela grasia long mi.

**SOTPELA PREA LONG SANTU MARIA
GOD BILONG MI,
LONG INTERSESEN BILONG MARIA
GIVIM GRASIA LONG MI!**

Yumi i mas beten Prea long santu Maria i stap long pes 7

VISITIM SANTU JOSEP

Bihain long 30-pela yia wantaim Jisas na Maria, santu Josep i bin dai long haus bilong Nasaret. Na taim santu Josep i pasim ai bilong em na i dai, em i pilim bikpela amamas na bel isi, long wanem Jisas na santu Maria i stap wantaim em.

Gutpela wasman bilong mi, santu Josep! Bipo mi bin mekim planti sin tumas. Tasol nau mi askim yu long helpim mi long

las aua bilong laip bilong mi, bai taim mi pasim ai bilong mi
na mi dai, mi tu i ken pilim amamas na bel isi.

SOTPELA PREA LONG SANTU JOSEP
JISAS, JOSEP NA MARIA,
HELPIM MI LONG LAS AUA BILONG MI!

Yumi i mas beten Prea long santu Josep i stap long pes 8

DE NAMBA 25

Pastaim yumi i mas beten Prea long Jisas i stap long pes 5

VISITIM JISAS

Santu Pol i tok olsem Jisas *i daunim em yet na i bihainim tok bilong God, i go inap long em i dai, yes, inap long em i dai long diwai kros* (Filipai 2:8). Tasol long sakramen bilong yukaris Jisas i no save bihainim tok bilong God tasol. Nogat. Long yukaris em i save bihainim tok bilong ol pris tu, na ol pris i save mekim Jisas i kamap gen long alta. Na Jisas i save bihainim tok bilong ol pris i go inap long dispela taim i pinis.

Jisas em i King bilong heaven na graun, tasol em i save harim tok bilong ol pris. Na taim pris i tok, Jisas i save kamap long alta, na ol pris i save kisim Jisas na givim long ol manmeri, putim Jisas long mostrans bai ol manmeri i ken adorim em, na kisim Jisas i go prosesio long olgeta ples. Na Jisas i no save mekim wanpela tok, na em i no save komplein. Em i save daunim em tasol na putim em yet long han bilong ol pris.

Taim Jisas i bin stap long dispela graun, em i bin bihainim tok bilong santu Maria na santu Josep tasol. Tasol nau em i

save bihainim tok bilong ol pris, na ol pris i save mekim Jisas i kamdaun long alta.

O gutpela Jisas! Long bikpela laik bilong yu tasol yu bin kamapim olgeta sakramen! Na dispela sakramen bilong yukaris i winim ol narapela sakramen! Tude mi laik litimpaim yu na adorim yu wankain olsem yu save litimapim na adorim Papa bilong yu.

Taim yu bin hangamap long diwai kros, yu bin tingting long mi. Na mi save olsem nau, taim yu stap long yukaris, yu save tingting long mi tu. O bikpela laik bilong yu, dia Jisas! Mekim bai ol manmeri i ken save long bikpela laik bilong yu i go long ol! Tingim diwai kros bilong yu na kisim ol sol i stap long klinpaia i go long heven hariap!

Mi laikim yu, mi litimpaim yu, mi adorim yu wantaim olgeta manmeri i save laikim yu long heven na long graun. Mekim hat bilong mi i kamap klin na rausim olgeta samting nogut i stap long em, na pulapim em long laik bilong yu. Santu Pol i tok: *Yes, God i save laikim yumi tru, na mi bilip tru olsem, i no gat wanpela samting inap pasim laik bilong God i kamap long yumi. Dai o laip, o ol ensel o ol strongpela spirit, o samting nau i stap o samting bai i kamap bibain, o kain kain samting i gat strong, o samting bilong antap o samting bilong daunbilo, o ol arapela samting i stap nabaut, dispela olgeta i no inap pasim laik bilong God, em dispela laik em i givim yumi long Krai Jisas, Bikpela bilong yumi* (Rom 8:38-39).

O Santu Hat bilong Jisas! Tingim ol pen yu bin karim bilong kisim bek mi, na helpim mi long laikim yu tru long ol pasin bilong mi. Mi no laik komplein taim mi karim pen, long wanem yu no bin komplein taim yu bin karim pen bilong kisim bek mi. Helpim mi long bihainim daun pasin bilong yu. Na helpim mi long bihainim pasin isi bilong yu tu. Tekewe olgeta samting

nogut i stap long hat bilong mi. Helpim mi long tanim bel, bai mi ken lustingting long amamas bilong dispela graun, na bai mi ken laikim yu tasol. Mi laik bihainim tok bilong yu oltaim olsem yu bin bihainim tok bilong Papa bilong yu.

**SOTPELA PREA LONG JISAS
SANTU HAT BILONG JISAS!
YU PAPA BILONG HAT BILONG MI.**

Yumi i mas beten Spiritual Komunio i stap long pes 6

VISITIM SANTU MARIA

Long Buk Baibel i gat tok olsem: *Long taim bilong Noa, pasin nogut i wok long kamap bikpela tru, tasol God i no bekim kwik. Nogat. Em i wet i go inap Noa i wokim pinis sip bilong em. Na liklik lain tasol, inap 8-pela manmeri, ol i bin i go antap long sip na bikpela wara i karim ol i go na God i kisim bek ol na ol i stap gut (1 Pita 3:20).* Santu Bernard i tok olsem Maria em i dispela sip Noa i bin mekim bilong stap gut long taim God i salim bikpela ren i kam long graun bilong kilim olgeta manmeri i dai. Na olsem sapos yumi i ran i kam long Maria, yumi bai stap gut. Na narapela santu i tok olsem Maria i winim dispela sip bilong Noa, long wanem long sip bilong Noa liklik lain manmeri tasol i bin kam insait na stap gut. Tasol Maria i save kisim olgeta manmeri na mekim ol i stap gut, na em i no save rausim wanpela man o meri i go ausait.

Sapos yumi i no gat Maria yumi bai lus olgeta! Tasol planti manmeri i save lus, long wanem ol i no save singaut long santu Maria.

SOTPELA PREA LONG SANTU MARIA
SANTU MARIA,
MI LAIK SINGAUT OLTAIM LONG YU
BAI YU KEN HELPIM MI!

Yumi i mas beten Prea long santu Maria i stap long pes 7

VISITIM SANTU JOSEP

Santu Bernard i tok olsem wanwan santu i gat pawa bilong helpim yumi long sampela samting mipela i sot long em. Tasol santu Josep i gat pawa bilong helpim yumi long olgeta samting yumi i sot long em. God i bin givim bikipela pawa long santu Josep, na pawa bilong em i winim pawa bilong ol narapela santu. Na santu Teresa i mekim wankain tok olsem santu Bernard.

Santu Josep, yu gutpela wasman bilong mi! Mi save olsem Jisas i save bihainim tok bilong yu oltaim, na olsem nau mi laik askim yu long helpim mi long prea gut.

SOTPELA PREA LONG SANTU JOSEP
SANTU JOSEP,
HELPIM MI WANTAIM BIKPELA PAWA BILONG YU
LONG KISIM OL SAMTING MI SOT LONG EM.

Yumi i mas beten Prea long santu Josep i stap long pes 8

DE NAMBA 26

Pastaim yumi i mas beten Prea long Jisas i stap long pes 5

VISITIM JISAS

Profet Aisaia i tok olsem: *God bilong Israel em i God bilong mekim gutpela na stretpela pasin olgeta. Em i gat biknem na em i stap wantaim yupela ol manmeri bilong Saion. Olsem na yupela i mas amamas na singaut strong na singim song long em (12:6).* O God! Yumi i mas amamas tumas na singaut strong, long wanem yumi i save olsem God bilong yumi i stap klostu long yumi, em i stap long olgeta ples bilong yumi na em i save haitim em yet insait long ol haus lotu bilong yumi.

Dispela sakramen em i sakramen bilong laik bilong God i kam long yumi. Santu Jon i tok olsem: *God yet em i as bilong dispela pasin bilong laikim ol arapela (1 Jon 4:8).* Na long dispela sakramen, Jisas, pasin bilong yu bilong laikim ol arapela i kamap ples klia olgeta. Tasol planti taim mi inap long harim yu, na i luk olsem yu komplein. Yu komplein bikos planti manmeri i save lusim yu i stap wanpis long yukaris na ol i no save kam na visitim yu. Bipo mi bin mekim wankain olsem ol, na planti taim mi bin lusim yu

i stap wanpis long haus lotu. Tasol nau mi laik senisim dispela les pasin bilong mi, na mi laik kam na visitim yu oltaim.

O gutpela Sevia bilong mi! Helpim mi long stap gut oltaim, na long mekim gutpela wok aposel bai planti manmeri i ken kam na visitim yu long santu sakramen. Taim mi stap klostu long yukaris, mi inap harim Papa bilong yu i tokim mi olsem em i bin tokim ol aposel bilong Jisas long maunten Tabor: «*Dispela em i Pikinini bilong mi, mi laikim em tumas*». *Yupela harim tok bilong em* (Mak 9:7). God Papa i tok olsem em i laikim yu tumas, na olsem mi tu mi mas laikim yu moa long olgeta samting.

Jisas, kirapim paia bilong yu insait long mi na kukim olgeta samting nogut i stap yet long bel bilong mi. Long wanem ol dispela samting nogut i ken kisim mi i go longwe long yu. Yu inap long helpim mi nau. Tekewe olgeta samting nogut i stap long laip bilong mi, bai mi ken givim mi yet olgeta long yu.

Jisas bilong mi, yu stap long yukaris! Mi laik bai yu stap wantaim mi olgeta de inap long dispela taim i pinis, na long las aua bilong mi, yu no ken lusim mi. Mi trastim yu.

SOTPELA PREA LONG JISAS
JISAS, LONG WANEM TAIM BAI MI INAP
LUKIM NAISPELA PES BILONG YU?

Yumi i mas beten Spiritual Komunio i stap long pes 6

VISITIM SANTU MARIA

Gutpela Mama bilong mi, yu tasol inap long oraitim mi. Santu German i tok: «Sapos mipela i wik, Maria em i strong

bilong mipela». Na santu Bonaventura i tok yu olsem wangepela dua i save helpim mipela long ranawe long sin. Yu bel isi bilong mipela. Yu malolo bilong mipela. Yu pulap long olgeta grasia. Na yu pulap long God yet. Na olsem sapos mipela i laik kisim grasia, mipela i mas kam long yu tasol.

SOTPELA PREA LONG SANTU MARIA
O MARIA! YU STRONG BILONG MI,
YU BEL ISI BILONG MI,
YU SALVESEN BILONG MI.

VISITIM SANTU JOSEP

Santu Bernard bilong Siena i tok: «Taim Jisas i bin stap long dispela graun, em i bin rispektim santu Josep oltaim. Nau tupela i stap long heven, na long heven Jisas i save rispektim santu Josep oltaim tu, long wanem Jisas i no inap long lustingting long olgeta samting santu Josep i bin mekim bilong helpim em».

Helpim mi, gutpela wasman bilong mi! Tokim Jisas long marimari long mi, long wanem mi bin mekim planti sin tumas! Mi laik mekim penans nau, bai Jisas i ken pogivim mi. Helpim mi long laikim Jisas na Maria inap long las de bilong laip bilong mi.

SOTPELA PREA LONG SANTU JOSEP
SANTU JOSEP, HELPIM MI
LONG STAP WANTAIM GRASIA BILONG GOD
LONG SOL BILONG MI NAU NA INAP
LONG LAS DE BILONG LAIP BILONG MI.

Yumi i mas beten Prea long santu Josep i stap long pes 8

DE NAMBA 27

Pastaim yumi i mas beten Prea long Jisas i stap long pes 5

VISITIM JISAS

Long Bikpela Pestode bilong Bodi na Blut bilong Krais, Mama Sios i save singsing amamas wantaim dispela tok bilong Buk Baibel: *Yupela tingim ol arapela lain pipel. Maski ol i gat bikpela strong, ol i no gat wanpela god i save sambai long helpim ol, olsem God, Bikpela bilong yumi, i save mekim long yumi. Oltaim Bikpela i stap klostu tru long yumi na taim yumi singaut long em, orait em i save helpim yumi* (Lo 4:7).

Ol manmeri bilong bipo i tingting olsem God i stap antap long heaven na i no gat wanpela man inap long toktok wantaim em. Tasol nau yumi i save pinis olsem God i kamap man, na tu em i haitim em yet long yukaris. Na olsem God i save stap namel long yumi oltaim, na yumi inap long toktok wantaim em olgeta de. God i hait i stap long tabernakel, na em i wetim yumi long san na long nait, na em i no save lusim yumi.

Dia Jisas! Yu laik stap namel long mipela inap long dispela taim i pinis, na olsem long bikpela laik bilong yu, yu bin

kamapim dispela sakramen bilong yukaris. Na olsem wanem planti manmeri i no save kam na visitim yu? Planti manmeri i save les olgeta long go long adoresen o visitim yu long haus lotu... tasol yu no save kros long ol. Yu save wetim ol tasol! Yu gutpela tumas, Jisas! Yu laikim ol tumas, na olsem yu wetim ol na yu no save lusim ol.

O God bilong mi! Helpim mi long stap wantaim yu oltaim. Mi no laik lusim yu. Bipo planti taim mi bin lusim yu, tasol nau mi laik senisim dispela pasin nogut bilong mi.

O God Papa! Tingim Pikinini bilong yu, na strongim mi long laikim sakramen bilong alta moa moa yet! Helpim mi long tingting long Jisas olgeta taim mi wokabaut klostu long haus lotu. Strongim mi bai laik bilong mi i go long yukaris i ken kamap bikipela moa yet!

**SOTPELA PREA LONG JISAS
GOD PAPA,
TINGIM JISAS NA HELPIM MI
LONG LAIKIM SAKRAMEN BILONG YUKARIS
MOA MOA YET!**

Yumi i mas beten Spiritual Komunio i stap long pes 6

VISITIM SANTU MARIA

Bipo King Devit i bin mekim wanpela bikipela taua long taun Jerusalen, em i ples bilong em yet. Dispela taua i pulap long planti soldia i save sambai long Jerusale, nogut ol birua i kam na bagarapim taun. Na King Devit i bin bilasim dispela taua wantaim planti naispela bis. Maria em i olsem dispela taua King Devit i bin mekim, long wanem em i save sambai

long yumi oltaim, na God i bin bilasim em long ol gutpela samting. Na taim yumi i kam long Maria, yumi bai stap gut na ol birua bilong yumi bai no inap long mekim wangepela samting long yumi. O Mama bilong mi! Yu strong tumas!

Mama bilong mi! Satan i save traim mi oltaim, na em i laik pulim mi long mekim sin. Tasol yu strong bilong mi, na mi save olsem yu bai helpim mi. Santu Efren i tok: «Maria i strong tumas, na em i no save lusim ol kristen manmeri i singaut long em». Helpim mi, Mama, mi hop long yu.

SOTPELA PREA LONG SANTU MARIA
O MARIA!
NEM BILONG YU EM I STRONG BILONG MI!

Yumi i mas beten Prea long santu Maria i stap long pes 7

VISITIM SANTU JOSEP

Santu Teresa i tok: «Long interesen bilong santu Josep God i bin helpim mi planti taim tru! Santu Josep i bin helpim mi long olgeta samting mi bin sot long em. Na mi no save long wangepela man o meri i bin prea long santu Josep, na santu Josep i no bekim prea bilong dispela man o meri. Na olsem yupela tu i mas trastim santu Josep na prea long em oltaim!».

O gutpela santu Josep! Mi laik bihainim ol gutpela eksampel bilong yu. Mi laik adorim God oltaim.

SOTPELA PREA LONG SANTU JOSEP
SANTU JOSEP, HELPIM MI LONG PREA GUT.

Yumi i mas beten Prea long santu Josep i stap long pes 8

DE NAMBA 28

Pastaim yumi i mas beten Prea long Jisas i stap long pes 5

VISITIM JISAS

Santu Pol i tok olsem: *God i no bin pasim Pikinini bilong em yet. Nogat. Em i bin salim em i kam bilong helpim yumi olgeta. Na sapos em i givim yumi Pikinini bilong em yet, orait ating em bai i givim yumi olgeta arapela samting tu* (Rom 8:32). Mipela i save pinis olsem God Papa i bin givim olgeta samting long Jisas. Na yumi i mas tenkim God Papa long laikim pasin na long bikpela marimari bilong em, long wanem taim em i givim Jisas i stap long yukaris long yumi, em i bin givim tu olgeta gutpela samting long yumi.

O Sevia bilong mi! Mi ken tok olsem yu bilong mi olgeta. Tasol mi no inap long tok olsem mi bilong yu olgeta, long wanem bipo planti taim mi no bin bihainim laik bilong yu. Helpim mi, bai mi no ken lusim yu gen.

Mi laik givim olgeta tingting, olgeta pasin na olgeta pen bilong mi long yu, nau na inap oltaim. Mi bilong yu tasol, na mi laik lusim olgeta samting bilong dispela graun na givim mi

yet olgeta long yu. Kukim mi long paia bilong laik bilong yu. Mi no laik pas wantaim ol samting bilong graun. Nogat tru. Laik bilong yu i go long mi i kamap ples klia pinis, na olsem nau mi laik bekim long yu na givim mi yet olgeta long yu.

O God Papa! Tingim olgeta gutpela pasin bilong Jisas, na helpim mi long kisim olgeta samting mi sot long em. Tingim Pen na Indai bilong Jisas na kisim mi olsem wokboi nating bilong yu. Mi tenkim yu long bikpela marimari bilong yu. Na mi trastim yu na mi save olsem yu bai pogivim olgeta sin bilong mi, na yu bai kisim mi i go long heven. Maski mi save mekim planti sin tumas, mi trast long yu na mi save olsem yu bai helpim mi.

Mi askim ol dispela samting long nem bilong Jisas Kraus. Jisas yet i tokim yumi olsem yu bai harim olgeta prea yumi i mekim long nem bilong em. Na olsem nau yu no ken les long harim ol prea bilong mi. Mi laik laikim yu tasol. Mi laik givim mi yet long yu wantaim olgeta samting bilong mi. Mi no laik lusim yu gen. Mi laikim yu tumas, God bilong mi. Yu laip bilong mi. Yu olgeta gutpela samting bilong mi.

SOTPELA PREA LONG JISAS
JISAS BILONG MI,
YU OLGETA GUTPELA SAMTING BILONG MI.
YU LAIKIM MI NA MI LAIKIM YU.

Yumi i mas beten Spiritual Komunio i stap long pes 6

VISITIM SANTU MARIA

Maria, taim mi lukim ol sin bilong mi, mi pilim marimari bilong yu. Taim mi tingting planti na bel bilong mi i hevi, mi

pilim bel isi bilong yu. Taim mi stap long taim bilong traim, mi pilim strong bilong yu. Yu gutpela Mama bilong mi! Ol santu i stap long heven i save kolim yu «Ples hait bilong ol manmeri bel bilong ol i hevi. Marasin i save oraitim mipela. Ples bilong ol manmeri i ken painim bel isi». Na olsem nau mi kam long yu na mi askim yu long givim bel isi long mi. Mi pulap long sin, mi pret long ol birua bilong mi, na laik bilong mi i go long Jisas i no bikpela tumas. Tasol yu inap long helpim mi. Helpim mi long tanim bel na stretim ol pasin bilong mi, bai mi ken givim amamas long Pikinini bilong yu na long yu tu.

SOTPELA PREA LONG SANTU MARIA
MAMA BILONG MI,
HELPIM MI LONG TANIM BEL.
MI TRAST LONG YU!

Yumi i mas beten Prea long santu Maria i stap long pes 7

VISITIM SANTU JOSEP

Olgeta katolik manmeri i save laikim santu Josep. Tasol sampela bilong ol i winim ol arapela, long wanem ol i laikim santu Josep moa yet. Na ol dispela lain i save laikim santu Josep moa yet, ol i save kisim planti grasia i winim ol grasia bilong ol arapela. Na olsem mipela i mas prea long yu, santu Josep, bikos yu inap long helpim mipela oltaim.

Dia santu Josep! Maria em i helpim bilong mi, tasol mi makim yu tu olsem helpim bilong mi na was santu bilong mi. Tingim laik bilong yu i go long Jisas na Maria, na kisim mi olsem wokboi nating bilong yu.

SOTPELA PREA LONG SANTU JOSEP
WAS SANTU BILONG MI, SANTU JOSEP,
HARIM OLGETA PREA BILONG MI.

Yumi i mas beten Prea long santu Josep i stap long pes 8

DE NAMBA 29

Pastaim yumi i mas beten Prea long Jisas i stap long pes 5

VISITIM JISAS

Long Buk bilong Revelesen i gat tok olsem: *Lukim, mi sanap long dua, na mi paitim i stap. Sapos wanpela man i harim maus bilong mi na i opim dua, orait bai mi go insait na i stap wantaim em* (3:20).

O gutpela wasman bilong ol sipsip! Yu laikim tumas ol sipsip bilong yu, na olsem yu bin dai bilong kisim bek ol. Tasol laik bilong yu i no pinis long diwai kros. Nogat. Yu laikim ol tumas, na olsem yu bin haitim yu yet long sakramen bilong yukaris, long olgeta haus lotu, bilong stap wantaim mipela inap oltaim. Na yu save paitim dua bilong hat bilong mipela, na yu singautim mipela long kam insait.

Na tu long Buk bilong Song bilong Solomon i gat narapela tok i olsem: *Long taim bilong biksan mi laikim tumas long sindaun aninit long dispela diwai* (2:3). Yu dispela diwai mipela i mas sindaun aninit long em na kisim malolo. Mi no ken lusim tabernakel bilong yu, long wanem yu stap long em. Mi laik stap klostu long yu long san na long nait. Maski ai bilong mi

i no inap lukim yu, mi laik stap klostu long tabernakel olgeta de, na bai mi painim amamas na bel isi.

Bikpela bilong mi, singautim mi bai mi ken stap wantaim yu oltaim. Sevia bilong mi, mi laik lusim ol samting bilong dispela graun na ran i kam long yu tasol.

Ol manmeri i save visitim yu long tabernakel i save kisim strong na mekim ol kain kain gutpela pasin. Tasol nau mi kam long yu olsem man i no gat wanpela samting bilong givim long yu, na mi sem nogut tru. Tasol mi kam long yu, na mi laik soim long yu olsem mi man nating, na mi save yu bai helpim mi na pulapim mi long planti grasia.

Yu stap long dispela sakramen bilong givim pe long ol manmeri i save laikim yu, na tu bilong givim strong long ol manmeri laik bilong ol i liklik tru.

Mi adorim yu, King bilong hat bilong mi! Yu laikim tumas ol manmeri. Yu gutpela wasman bilong ol sipsip. Na olsem tude mi kam long yu bilong soim hat bilong mi long yu. Hat bilong mi i no gat planti gutpela samting long em. Tasol mi laik givim em long yu.

Singautim mi, Jisas, na helpim mi bai mi ken bihainim laik bilong yu oltaim. Mi laik pas wantaim yu oltaim. Mi laik lusim olgeta samting bilong dispela graun, na mi laik painim yu tasol. Mi laikim yu tumas, Bikpela bilong mi. Mi givim mi yet long yu. Helpim mi long painim yu, na no ken lusim mi.

SOTPELA PREA LONG JISAS
JISAS BILONG MI,
MI LAIKIM YU TASOL
NA MI NO LAIKIM NARAPELA SAMTING.

Yumi i mas beten Spiritual Komunio i stap long pes 6

VISITIM SANTU MARIA

Santu Bernard i save kolim santu Maria «Rot bilong painim salvesen». Kwin bilong mi! Dispela santu i tok olsem yu save kisim ol manmeri na helpim ol long wokabaut gut long rot i go long heven. Na olsem mi askim yu long holim han bilong mi na helpim mi tu long wokabaut long dispela rot. Na sapos sampela de mi slek na mi laik wokabaut long narapela rot, yu mas holim mi strong na stretim mi.

Soim bikpela pawa bilong yu, Mama Maria, na helpim mi long wokabaut gut long rot i go long salvesen. Bipo mi bin stap longwe long dispela rot, tasol nau mi trast long helpim bilong yu.

SOTPELA PREA LONG SANTU MARIA

O MARIA!

YU INAP LONG HELPIM MI

LONG KAMAP SANTU.

MI TRASTIM YU!

Yumi i mas beten Prea long santu Maria i stap long pes 7

VISITIM SANTU JOSEP

Sapos taim santu Josep i bin stap long haus bilong Nasaret na wanpela man bilong sin i kam na i tokim em olsem em i laik lukim Jisas na askim pogivim bilong ol sin bilong em, ating santu Josep bai les long opim dua long dispela man? Nogat tru. Wantu tasol santu Josep bai opim dua bilong haus na helpim dispela man bilong sin long painim Jisas. Olsem

tasol, sapos yumi i laik painim Jisas, yumi i mas askim santu Josep long helpim yumi.

O gutpela santu Josep! Helpim mi long painim marimari bilong Jisas na abrusim ol sin inap long las de bilong laip bilong mi.

SOTPELA PREA LONG SANTU JOSEP
WASMAN BILONG MI,
LONG INTERSESEN BILONG YU
MI LAIK PAINIM MARIMARI BILONG JISAS
NA STAP GUT INAP LONG LAS DE
BILONG LAIP BILONG MI.

Yumi i mas beten Prea long santu Josep i stap long pes 8

DE NAMBA 30

Pastaim yumi i mas beten Prea long Jisas i stap long pes 5

VISITIM JISAS

Long Buk Baibel, Jop i tokim God olsem: *Bilong wanem yu save haitim pes bilong yu long mi?* (Jop 13:24). Jop i pret long God i haitim pes bilong em, long wanem Jop i gat bikipela laik long lukim em. Na long santu yukaris God i save haitim pes bilong em long yumi tu, na yumi i no inap lukim em. Tasol yumi i no ken pret. Yumi i mas amamas, long wanem em i bin haitim em yet bilong givim bel isi long yumi na bai yumi i no ken pret long bikipela bilas bilong em. Novariano i tok olsem: «Taim God i haitim pes bilong em long yukaris, em i save soim bikipela laik bilong em long yumi. Na laik bilong God i kamap ples klia».

Sapos God i soim bikipela bilas bilong em long yumi na soim pes bilong em long yumi, ating bai no gat wanpela man o meri long graun inap long sanap long pes bilong em. Nogat. Olgeta manmeri bai pret na guria long sanap long ai bilong God, long wanem bilas bilong em i bikipela tumas. Na olsem

em i daunim em yet na haitim long yukaris, bai mipela i no ken pret long kam long em, na sanap long ai bilong em.

O gutpela Hat bilong Jisas! Hat bilong olgeta manmeri bilong graun i mas kam long yu. Hat bilong yu i pulap long paia i save kukim yumi! Helpim mi long pas wantaim yu oltaim.

O gutpela Hat bilong Jisas, yu op olgeta! Spia i bin sutim yu na nau yu op, na yu olsem ples hait bilong ol manmeri bilong sin. Long diwai kros yu bin karim bikpela pen long ol sin bilong mi, bikos yu laikim mi tumas. Na mi save olsem long santu yukaris yu save laikim mi tumas wankain olsem yu bin laikim mi long Kalvari. Na long dispela as tasol mi laik stap wantaim yu oltaim.

Na olsem wanem planti taim mi save givim baksait long yu? O Jisas bilong mi! Tingim Pen na Indai bilong yu, na mekim mi i pas long yu. Mi laik lustingting long amamas bilong dispela graun, na mi laik givim amamas long yu tasol. Helpim mi, bai mi ken kamap bilong yu tasol.

O bikpela laik bilong God! Tekewe olgeta samting nogut i stap yet long hat bilong mi.

O Maria, yu hop bilong mi! Helpim mi long kisim ol dispela samting nau mi singaut long em.

SOTPELA PREA LONG JISAS

«KRAIS I SAVE LAIKIM YUMI MOA YET,

NA I NO GAT WANPELA SAMTING

INAP PASIM DISPELA LAIK BILONG EM

I KAMAP LONG YUMI WAN WAN» (ROM 8:35).

Yumi i mas beten Spiritual Komunio i stap long pes 6

VISITIM SANTU MARIA

Santu Bernard i tok olsem laik bilong Maria i go long yumi i bikipela tumas, na i no gat wanpela man o meri i ken winim em. Oltaim Maria i redi long helpim yumi wantaim bikipela pawa bilong em.

Maria, yu Kwin bilong mi! Mi hop long bikipela laik na pawa bilong yu, na mi save olsem yu bai helpim mi long sevim sol bilong mi.

Wanpela santu i tok: «O santu Maria! Long graun mipela i stap long bikipela pait, long wanem Satan i laik bagarapim mipela. Helpim mi nau. Na taim mi laik lus, kam hariap na kisim mi. O gutpela Mama! Holim strong han bilong mi na sambai long mi oltaim».

O God bilong mi! Mi mas winim yet planti traim sapos mi laik go long heven. O Maria, yu ples hait na yu strong bilong mi! No ken lusim mi, na helpim mi long stap oltaim wantaim God. Na long taim bilong traim, oltaim bai mi singautim yu.

SOTPELA PREA LONG SANTU MARIA
HELPIM MI, MARIA, HELPIM MI OLTAIM!

Yumi i mas beten Prea long santu Maria i stap long pes 7

VISITIM SANTU JOSEP

Long ol manmeri i save laikim santu Josep, em i save helpim ol long laikim Jisas moa moa yet. Helpim mi, gutpela wasman bilong mi, na givim grasia long mi bai mi ken laikim Jisas wantaim olgeta strong bilong mi.

SOTPELA PREA LONG SANTU JOSEP
GUTPELA SANTU JOSEP,
HELPIM MI LONG WOKABAUT LONG ROT
I GO LONG JISAS.

Yumi i mas beten Prea long santu Josep i stap long pes 8

DE NAMBA 31

Pastaim yumi i mas beten Prea long Jisas i stap long pes 5

VISITIM JISAS

Long Gutnius bilong santu Jon i tok olsem wanpela de Jisas i tait, na olsem em i sindaun klostu long hul wara long taun Samaraia. Na wanpela meri i kam long em, na tupela i toktok, na Jisas i bin mekim dispela meri i tanim bel na i bilip long em (Jon 4).

Long santu yukaris Jisas i save mekim wankain samting long yumi. Em i save wet i stap, bai yumi i ken kam long em olsem dispela meri bilong Samaraia i bin mekim. Jisas i pulap long planti grasia, tasol em i wetim yumi, bai yumi i kam long em na askim em olgeta samting yumi i sot long em.

Jisas i stap long santu sakramen bilong alta, na em i tokim yumi olsem: «Yupela ol manmeri, olsem wanem na yupela i save ranawe long mi? Olsem wanem na yupela i no save kam na visitim mi? Mi laikim yupela tumas na mi bin daunim mi yet bilong helpim yupela. Yupela i pret long mi olsem wanem? Mi no kam long dispela graun bilong kotim yupela. Nogat. Mi

haitim mi yet long yukaris bilong helpim yupela na bilong kisim bek ol manmeri i save laikim mi».

Long heven Jisas i save prea oltaim bilong helpim yumi. Long santu yukaris em i save mekim wankain samting, long san na long nait. Em i no save les long prea bilong helpim yumi. Wanpela save man bilong Sios, Tomas bilong Kempis, i tok olsem: «Yumi i mas go visitim Jisas i stap long yukaris. Na yumi i no ken pret long Jisas. Nogat. Yumi i mas go visitim em wantaim bikpela amamas na bel isi, wankain olsem wanpela pren i save go visitim pren bilong em».

Na olsem nau, Bikpela bilong mi, mi laik opim hat bilong mi na tokaut klia long yu: yu bin karim bikpela pen bilong kisim bek ol manmeri, tasol planti bilong ol i save givim baksait long yu. Yu save singautim ol bai ol i ken kam bek long yu, tasol ol i olsem yaupas na i no harim nek bilong yu. Yu laik helpim ol, tasol ol i les long yu. O Jisas bilong mi! Mi pret nogut mi tu i save givim baksait long yu! Nau mi laik tanim bel na mekim gut long yu tasol, na givim amamas long yu long ol gutpela pasin bilong mi. Mi laik bihainim laik bilong yu oltaim.

God bilong mi, mi promis long yu olsem bai mi wok hat bilong wokabaut long gutpela rot i go long yu, maski mi mas karim pen o mi mas lusim famili bilong mi, ol pren bilong mi o laip bilong mi yet.

Mi laik lusim olgeta samting bilong mi bilong painim yu tasol. Na sapos mi lusim olgeta samting bilong mi na mi painim yu, mi bai amamas moa yet! Mi laikim yu tumas! Mi laik laikim yu olsem ol serafin na olsem Mama Maria i save laikim yu.

SOTPELA PREA LONG JISAS
GOD BILONG MI,
MI BILONG YU NA YU BILONG MI!

Yumi i mas beten Spiritual Komunio i stap long pes 6

VISITIM SANTU MARIA

Ol santu i save tok olsem santu Maria i save beten oltaim bilong helpim mipela, na ol prea bilong Maria i gat bikpela pawa long ai bilong God. Maria i save marimari long yumi na prea bilong helpim yumi oltaim.

Na olsem nau, gutpela Mama bilong mi, yu mas lukim ol sin bilong mi na marimari long mi. Yu mas beten bilong helpim mi nau na inap long las de bilong laip bilong mi.

Jisas em i nambawan helpim bilong mi. Tasol yu, Maria, yu namba tu helpim bilong mi. Mi laik stap olsem wokboi nating bilong yu inap long las de bilong mi, bai mi ken go long heven na litimapim nem bilong yu oltaim.

SOTPELA PREA LONG SANTU MARIA
O MARIA, MAMA BILONG MI,
MI LAIK STAP WANTAIM YU OLTAIM!

Yumi i mas beten Prea long santu Maria i stap long pes 7

VISITIM SANTU JOSEP

Olgeta katolik manmeri i save olsem santu Josep em i wasman bilong ol manmeri i laik i dai. Na Mama Sios i save tok olsem santu Josep i save helpim yumi long taim bilong

indai. Em i bin indai klostu long Jisas na Mama Maria. Na olsem ol manmeri i save laikim santu Josep i mas hop long em na askim em long helpim ol long taim bilong indai.

Dia santu Josep, mi man bilong mekim sin, tasol nau mi askim yu long helpim mi long taim bilong indai bilong mi, bai mi tu i ken indai klostu long Jisas na Mama Maria, wankain olsem yu.

SOTPELA PREA LONG SANTU JOSEP
SANTU JOSEP,
PREA BILONG HELPIM MI
NAU NA LONG TAIM BILONG INDAI BILONG MI.

Yumi i mas beten Prea long santu Josep i stap long pes 8

LOTU BENEDIKSEN

Singsing «Yumi laik adorim Jisas»

Yumi laik adorim Jisas,
Em i stap hia long alta.
Sakramen blong Em stap oltaim,
bipo i no yet kamap.
Nau bilip i skulim yumi,
i hait tasol Em i stap.

Long God Papa na long Son tu,
yumi givim ona nau.
Na God Spiritu Santu,
yumi tu adorim Em.
Em kamap long Son na Papa,
wankain i ona long Em. Amen.

1) Prea bilong blesim

Pris: Yu givim bret bilong heven long ol.

Ol: Em i namba wan tru.

Pris: Yumi pre: Jisas, yu bin givim dispela gutpela sakramen long mipela, bai mipela i tingting long pen na dai bilong yu. Mipela i askim yu: helpim mipela long onaim sakramen bilong bodi na blut bilong yu, bai mipela i ken kisim oltaim strong bilong oraitim mipela. Yu stap king nau na oltaim.

Ol: Amen.

2) Pre bilong blesim

Pris: Yu givim bret bilong heven long ol.

Ol: Em i namba wan tru.

Pris: Bikpela Jisas Krais, yu Ridima bilong mipela. Yu God tru na man tru. Yu stap amamas wantaim Papa bilong yu na Holi Spirit. Na tu yu stap hia long hostia namel long mipela long olgeta de. Tru, planti taim mipela i no onaim yu gut, na mipela i mekin sin long pasin les o pasin paul bilong mipela. Mipela i sori long ol dispela rong. Tude mipela i laik onaim yu long dispela sakramen, na mipela i laik tenkim yu long bikpela marimari bilong yu. Yu stap king nau na oltaim.

Ol: Amen.

3) Pre bilong blesim

Pris: Yu givim bret bilong heven long ol.

Ol: Em i namba wan tru.

Pris: Bikpela Jisas Krais, yu laip na strong bilong mipela. Mipela i save, sapos mipela i no pas long yu, mipela i no stap gut. Long wanem, yu tasol inap long givim laip na strong long mipela. Mipela i kam bilong tenkim na adorim yu. Yu stap king nau na oltaim.

Ol: Amen.

LITANI BILONG GOD TRIWAN, SANTU MARIA NA SANTU JOSEP

Yumi onaim God
Yumi onaim nem bilong em
Yumi onaim Jisas Krai, em i God tru na man tru
Yumi onaim nem bilong Jisas
Yumi onaim Jisas long dispela sakramen bilong alta
Yumi onaim hat bilong Jisas
Yumi onaim blut bilong Jisas
Yumi onaim Holi Spirit
Yumi onaim santu Maria, mama bilong God
Yumi onaim nem bilong Maria, Virgo Imakulata
Yumi onaim Maria, God i kisim em i go long heven
Yumi onaim santu Josep, man bilong Maria
Yumi onaim God long ol ensel na long ol santu

LITANI BILONG JISAS

Bekim: Jisas, mi laikim yu

Jisas, nau yu stap wantaim mi
Jisas, yu Pikinini bilong God, yu stap wantaim mi
Jisas, yu Bikipela bilong heven na graun
Jisas, yu Ridima bilong mi
Jisas, yu save tekewe ol sin bilong mi
Jisas, yu save givim strong long mi
Jisas, yu save bringim mi long heven
Jisas, yu gut olgeta, yu tru olgeta
Jisas, yu stap wantaim God Papa na Holi Spirit

Jisas, yu stap wantaim ol ensel
Jisas, yu stap wantaim santu Maria
Jisas, yu stap wantaim ol santu
Jisas, yu stap wantim mi

LITANI BILONG HOLI SPIRIT 1

Bekim: Kam, Holi Spirit, mipela i singaut long yu

Holi Spirit, strongim bilip bilong mipela
Holi Spirit, givim gutpela tingting long mipela
Holi Spirit, stiaim mipela long took tru na stretpela pasin
Holi Spirit, pulapim mipela long save bilong God
Holi Spirit, helpim mipela long laikim God na ol manmeri
Holi Spirit, helpim mipela long kamap nupela manmeri
Holi Spirit, helpim mipela long prea gut
Holi Spirit, tekewe mipela long pasim bilong sin
Holi Spirit, helpim mipela long mekim wok bilong God

LITANI BILONG HOLI SPIRIT 2

Bekim: Marimari long mipela

Holi Trinit, wanpela God tasol
God Holi Spirit
Holi Spirit, yu kamap long Papa na long Pikinini
Holi Spirit, yu wankain olsem Papa na Pikinini
Holi Spirit, yu Bikpela i givim laip long mipela
Holi Spirit, yu Spirit bilong bilip na hop na laik
Holi Spirit, yu Spirit bilong tok i tru na laik

Holi Spirit, yu Spirit bilong save i skelim kain kain tingting
Holi Spirit, yu Spirit bilong mekim klia tok bilong God
Holi Spirit, yu Spirit bilong stretpela pasin

LITANI BILONG BODI NA BLUT BILONG JISAS 1

Bekim: Marimari long mipela

Jisas, yu bret i givim laip
Jisas, yu bret bilong heven
Jisas, yu God na man
Jisas, yu stap long hostia
Jisas, yu stap namel long mipela
Jisas, yu Lem bilong Pasova
Jisas, yu ofa bilong olgeta manmeri
Jisas, yu as bilong olgeta strong
Jisas, yu kaikai bilong mipela
Jisas, yu as bilong amamas bilong mipela
Jisas, yu oraitim ol sikmanmeri

LITANI BILONG BODI NA BLUT BILONG JISAS 2

Bekim: Oraitim mipela

Jisas, long ofa bilong diwai kros
Jisas, long blut bilong yu i lus
Jisas, long bikpela laik bilong yu

Jisas, long kirap bilong yu
Jisas, long go bek long heven bilong yu
Jisas, taim yu stap hia long Holi Yukaris
Jisas, long dispela taim yu kam bek gen

LITANI BILONG SANTU HAT BILONG JISAS

Bekim: Marimari long mipela

Hat bilong Jisas, Pikinini bilong God Papa, i stap oltaim
Hat bilong Jisas, Holi Spirit i mekim yu i kamap man
Hat bilong Jisas, yu gat bikpela nem tru
Hat bilong Jisas, yu mak bilong God i stap wantaim mipela
Hat bilong Jisas, yu haus bilong God na dua bilong heven
Hat bilong Jisas, yu laikim mipela tumas
Hat bilong Jisas, marimari bilong yu i bikpela tru
Hat bilong Jisas, yu king bilong olgeta manmeri
Hat bilong Jisas, olgeta pasin bilong God i stap long yu
Hat bilong Jisas, strong bilong yu i mekim mipela i orait
Hat bilong Jisas, yu tekewe ol sin bilong mipela
Hat bilong Jisas, ol sin bilong mipela i mekim nogut long yu
Hat bilong Jisas, spia i sutim yu
Hat bilong Jisas, Pikinini bilong God Papa, i stap oltaim

LITANI BILONG SANTU MARIA

Pris: Lord, marimari long mipela

Ol: *Lord, marimari long mipela*

Pris: Krais, marimari long mipela
Ol: *Krais, marimari long mipela*
Pris: God Papa long heven
Ol: *Marimari long mipela*
Pris: God Pikinini, Ridim bilong ol manmeri
Ol: *Marimari long mipela*
Pris: God, Holi Spirit
Ol: *Marimari long mipela*
Pris: Holi Trinit, wanpela God tasol
Ol: *Marimari long mipela*

Bekim: Pre bilong helpim mipela

Santu Maria
Santu Mama bilong God
Santu Virgo, yu go pas long lain bilong ol virgo
Mama bilong Krais
Mama, yu gutpela tru
Mama, yu stret tru
Mama, yu pulap long strong bilong God
Virgo, yu pulap long gutpela save
Virgo, yu marimari tru
Virgo, yu bilip tru
Maria, yu hop bilong mipela
Maria, yu helpim bilong ol sikmanmeri
Maria, yu strong bilong ol i gat hevi
Maria, yu helpim bilong ol kristen manmeri
Yu kwin bilong ol ensel
Yu kwin bilong ol profet
Yu kwin bilong ol aposel

Yu kwin bilong ol martir
Yu kwin bilong ol misinari
Yu kwin bilong ol santu
Yu kwin i no gat sin
Yu kwin i stap nau long heven
Yu kwin bilong holi rosari
Yu kwin bilong gutpela taim tru
Yu kwin bilong ol famili

